

Luganda

Siniya y'ekusatu

Ekitabo

ky'omusomesa

Ebiri munda

Essuula 1: Ebyemizannyo, N'okwewummuzaamu.....	1
1.1: Ebika by'emizannyo	2
1.2: Nakasigirwa ezoobwannannyini ne Nakasigirwa endazi	6
1.3: Okuzannya zzaala	8
1.4: Olulimi Iw'ebyemizannyo.....	10
1.5: Okuteekateeka/Okutegeka Omukolo.....	12
1.6: Ebikulu ebikwata ku muntu mu bufunze	14
1.7: Okwewummuzaamu	15
1.8: Okuwandiika emboozи ey'okukubaganya ebirowoozo	19
Essuula 2: Ebyobulambuzi eby;ennono	23
2.1: Olulimi Iw'ebyobulambuzi.....	24
2.2: Eby'omunsiko bya Uganda	25
2.3: Okuyiga ku Mbu z'amannya mu Luganda.....	31
2.4: Ebifo n'ebantu eby'ennono	32
2.5: Emigaso n'okusoomoozebwa okwolekedde enkuuma n'enkozesza y'ebyomunsiko ennungi	36
Essuula 3: Ebika	43
3.1: Ennono y'ebika	44
3.2: Embu z'Amannya.....	48
3.3: Ebbaluwa eyita omuntu ku mukolo	51
3.4: Ebiwanuuuzibwa.....	54
Essuula 4: Okubanga obugagga obw'ensibo	57
4.1: Obugagga	58
4.2: Okubangawo obugagga obw'ensibo	60
4.3: Nnakongeza linnya	64
4.4: Enkozesza y'obugagga ennungi n'embi	69
4.5: Litulica Omwogere	73
Essuula 5: Okutegeera obutondebwensi.....	80
5.1: Ebantu eby'obutonde ebikola obutondebwensi	81
5.4: Okuwandiika ekirango.....	90
5.5: Nakalazi / Ssenfo	92

5.6:	Ebitontome ne ppuloozi	93
5.7:	Olulimi olweyambisibwa nga twogera ku butondebwensi	97

Essuula 6: Amazzi.....101

6.1:	Ensibuko y'amazzi amayonjo n'agayali mayonjo.....	102
6.2:	Emigaso gy'amazzi	105
6.3:	Okusoma ekitundu n'okukitegeera.....	105
6.4:	Okufunza.....	109
6.5:	Okukyusa	114
6.6:	Nnakongezalinnya	117



Essuula 1: Ebyemizannyo, N'okwewummuzamu

Ensoma 14

Oluvannyuma Iw'essuula eno, omuyizi asuubilwa okuba ng'asobola:

Ebigambo ebikulu

- Ebyemizannyo
- Okwewummuzamu
- Ennono
- Nakasigirwa
- Okuzannya zzaala
- Amateeka
- Omukolo
- Emboozi
- Emizannyo

- Okumenya emizannyo egizannyibwa mu kitundu gy'obeera.
- Okunnyonnyola obukulu bw'emizannyo Okulaga enjawulo wakati w'emizannyo egizannyibwa ensangi zino, n'egyazannyibwanga edda oba eg'yennono.
- Okukozesa Nakasigirwa ezoobwannannyini ne Nakasigirwa endazi.
- Okunnyonnyola ebibi/ebibibu ebiri mu kuzannya emizannyo egirimu okukuba zzaala, era n'okunnyonnyola aki okuzannya zzaala tekikkirizibwa mu mateeka.
- Okukozesa/okweyambisa olulimi Iw'ebymizannyo.
- Okutegeka/okuteekateeka omukolo.
- Okuwandiika ebintu ebikulu ebikwata ku muntu mu bufunze.
- Okunnyonnyola okwewummuzamu kye kitegeeza.
- Okumenya ebintu ebyenjawulo abantu bye bakola okwewummuzamu ensangi zino, n'ebiyakolebwanga edda.
- Okunnyonnyola ebirungi n'ebibi ebiri mu kwewummuzamu ebitali bimu. Okuwandiika emboozi ey'okukubaganya ebirowoozo.

Essuula mu bufunze

Ebyemizannyo n'okwewummuzaamu kati byafuuka kitundu ku bulamu bwaffe era kizibu nnyo kati okubyewala. Wabula emizannyo n'ebikolebwa okwewummuzaamu bingi gye tubeera, n'olwekyo ekigendererwa ky'essuula eno kwe kuyamba omuyizi ayige nti emizannyo n'ebikolebwa okwewummuzaamu ebimu biyinza okumuviiramu obuzibu, mu ngeri eyo amanye ebisaanye n'ebitasaanye abyewale.

Ebinaakuyamba/eby'okukozesa

Oja kwetaaga ekipande ng'owandiiseeko olukalala lw'emizannyo egizannyibwa mu kitundu kyo, ate n'emirala ginoonyereze ku mutimbagano naddala egyo egizannyibwa ensangi zino.

Enkola y'okusomesa

Omuyizi aweebwe omwagaanya okwenyigira mu bisomesebwa. Kirungi abayizi bakole ne bannaabwe, ate obaleke beeziulire. Oyinza n'okukozesa enkola y'okubabuza ebibuuzo nga bwe baddamu.

1.1: Ebika by'emizannyo

Essomo lino ligendera kuyamba omuyizi avumbule emizannyo egyenjawulo egyazannyibwanga edda n'egyo egizannyibwa ensangi zino.



Ekyokukola 1. Okusoma

Ekitundu eky'okusoma


Emizannyo gifuse kitundu kya bulamu bwaffe yonna gye tubeera.

Emizannyo egisinze oku manyika mulimu omupiira ogw'ebigere, okubaka, ensero, okuddukira mu kkutiya, okumeggana, ebikonde n'emirala. Kyokka bo bajjaffe baali bayiiya nnyo bwe kyatuukanga ku by'emizannyo., kuba baalina miyitirivu nnyo okugeza nga, omweso, ekigwo, jjangu onkwekule, enkuyo, okubaka amayinja, ssekitulege, ggogolo, ssemufu, n'emirala mingi.

Emizannyo gino gyayambanga abantu okuwummaza ebirowoozo, okwogiwaza obwongo, okukolagana obulungi ne bantu bannaabwe, n'emigaso emirala njolo, naye emigaso ngegyo giyinza obutasangika mu mizannyo egizannyibwa leero.







Ekyokukola 2. Okuwandiika

Luṇṇamya abayizi;

1. Bamenye emizannyo egyenjawulo egirabikira mu bifaananyi ebibaweeddwa nga bwe baawuula egy'edda ku gizannyibwa leero.
2. Nga bakolera mu bibinja balondeko ogusinga okubanyumira baguwandiikeko emboozi nga bwe balagiddwa.



Ekyokukola 3. Okuwuliriza n'okwogera

Luñjamya abayizi basome emboozi y'okwogeraganya ebaweeddwa n'oluvannyuma bagogeremu nga bweri:

Bwanika okuva e Kyamulibwa

Ssebaggala: Bwanika, osiibye otya munnage?

Bwanika: Sibadde bubi, ggwe ogamba otya?

Ssebagala: Nga oli munakuwavu, kiki? Tugende tulabe omupiira, Arsenal y'esamba leero.

Bwanika: Nze sinyumirwa mipiira!

Ssebaggala: Nkitegeera Arsenal togimatira, naye tuyinza okulabamu omuzannyo omulala.

Bwanika: Muzannyo ki?

Ssebaggala: Emizannyo mingi! Waliwo emisinde, ensero, n'emirala.

Bwanika: Egyo gyonna nze teginnyumira.

Ssebaggala: Naye ka mbuuze, oviira wa Bwanika?
Muzannya mizannyo ki eyo?

Bwanika: Nviira Kyamulibwa Masaka mu ssaza ly'e Buddu. Ffe tuzannya mweso, ekigwo, enkuyo, kubaka mayinja, mbirigo, ggogolo, ssemufu n'emirala. Kati oseka ki?

Ssebaggala: Anti emizannyo gyo gimpulikikidde bulala.
Ssemufu? Kati mwalinga muziikula bafu.

Bwanika: Hmmm! Giwulikika bulala naye girina emigaso mingi okusinga egigyo gy'obadde onnyumiza.

Ssebaggala: Waa? Enjawulo eri ludda wa?

Bwanika: Eh eh! Leka nkubuulire ggwe, emizannyo egyaffe gya njawulo nnyo! Okugeza, ffe egyaffe tugirabira bwereere awatali, ate girina emigaso mingi eri obulamu bwaffle okusinga gye muzannya ensangi zino.

Ssebaggala: Kyokka Bwanika! Olinga atakimanyi nti emizannyo gy'ensangi zino abantu bagigaggawaliddemu? Laba Kiprotich ne Moses Ggolola, obasinga ssente n'ettutumu?

Bwanika: Kale bayinza okuba n'essente nga balina n'ettutumu, naye era gye biggweera nga balina muli ekibabulako nga bbo. Ggwe towulirangako banna byamizannyo batutumufu beetuze?

Ssebaggala: Eh, obudde bugenze kanzire eka, tunaddamu sseruganda beera bulungi.

Bwanika: Kale naawe beera bulungi.





Ekyokukola 4. Okuwandiika

Luŋjaya abayizi nga bakola babiri babiri.

1. Bawandiike ku migaso egiri mu kuzannya emizannyo.
2. Buli bamu basomere bannaabwe bye bawandiise.
3. Yongereza ku by'abayizi bye bawandiise, n'okukkaatiriza ebituufu ku byo.

Egimu ku migaso egiri mu kuzannya emizannyo.

- Okutumbula ebitone n'okubikulaakulanya..
- Gitumbula enkolagana ennungi wakati mu bantu.
- Gitondawo emirimu n'okutumbula enfuna y'abantu.
- Gituyamba okubeera abalamu mu mibiri ne mu bwongo.
- Gyogwaza obwongo, ne kituyamba n'okutegeera bye tusoma mu kibiina.
- Giyamba abagizannya okufunamu obukugu obw'enjawulo mu bye bazannya.
- Emizannyo giyamba abantu okumanyika, mu bitundu gye babeera ne mu nsi yonna.
- Abantu beewangulira ebirabo n'ebintu ebirala eby'omuwendo.
- Giyamba okutumbula empisa n'ebiyobuwangwa.

1.2: Nakasigirwa ezoobwannannyini ne Nakasigirwa endazi

Nakasigirwa ezoobwannannyini

Abayizi bannyonyole Nakasigirwa ezoobwannannyini kye kitegeeza. Ebigambo ebisigira erinnya nga biraga obwannannyini ku kintu nekiba kyogerwako. Okugeza – ange, -affe, -abwe, n'ebirala.



Ekyokukola 1. Okusoma

Luŋjamya abayizi basome ekitundu ekibaweeddwa n'oluvannyuma banokoleyero Nakasigirwa ezoobwannannyini ezeeyambisiddwa mu kyo.


Okukuba eddubi

Okuwuga, oba okukuba eddubi nga bwe twakyeyitiranga, gwali muzannyo gwange nnyo mu buto. Bwe twatwalanga embuzi ku ttale ne baganda bange, nga tulina okuyitirako mu kisenyi ne tukuba ku ddubi. Eno nga munnaffe omu alabiriza embuzi zireme kukutula kulya mmere y'abantu, ffe abalala tweyunanga ekidiba wamma ggwe omuzannyo ne gunyuma.

Ng'okukuba eddubi kukutte akati, abakuguse mu kuwuga baaweekanga bannaabwe abatannayiga mbu ng'olwo boolesa obukugu bwabwe. Waliwo bannaffe abaakwatibwanga ensisi nga babawese, n'ekyavangamu kugwa mu mazzi ne babbira. Sigenda kwerabira kizibwe wange Ssemujju lwe yagwa mu mazzi kata naye abbire mu mbeera eyo ey'okweraga. Ssemujju yatuuka ng'awakana ne mukwano gwe Kyakabaale mbu ye asobola okuweeka abalenzi babiri n'awuga okumalako ekidiba. Ekidiba kyali kiwanvu nno! Ssemujju ng'ayita bavubuka babiri mikwano gye, ng'abagamba bamudde ku mabega.

Ssemujju ky'ataamanya nti evvubuka erimu lye yali aweese lyali lyeriira emmere yaalyo n'eriwerera. Munnange baba batuuka mu makkati g'ekidiba Ssemujju obuzito ne bumuyinga, twagenda okulaba ng'emikono gye gye gyokka egirabikako mu bbanga, abalenzi bonsatule babbidde!

Nalinawo bannange awo abaali bakuguse mu kuwuga nga mbawenyako tudduukirire bannaffe nga tebannamira mazzi mangi naye kaabula kata....! Bwetutyo ne tuyita ku lugwanyu munnange!





Ekyokukola 2. Okuwandiika

1. Luñjamya abayizi banokoleyo Nakasigirwa ezoobwannannyini ezikozeseddwa mu kitundu.
Ebimu ku bye bayinza okuggyayo mulimu:
 - -ange, -affe, -abwe, gye, n'ebirala.
2. Luñjamya abayizi bawandiikeyo sentensi nga bakozesa nakasigirwa ezoobwannannyini ez'enjawulo

Ekyokulabirako

- Eggaali ya Okello efaanana n'eyaffe.

Nakasigirwa endazi

Nnyonnyola abayizi Nakasigirwa endazi kye ki. Ebigambo ebiyimirirawo ku lw'erinnya nga bulaga ekintu ekyogerwako we kiba kiri. Okugeza, ono oyo oli.



Ekyokukola 3. Okwogera na kuwuliriza

1. Luñjamya abayizi engeri y'okukozesaamu nakasigirwa endazi, nga beeyambisa sentensi ezibaweeddwa. Mukasa ajja kugamba nti.
 - a) Eggaali eno
 - b) Omupiira ogwo
 - c) Ekisaawe kiri.

1.3: Okuzannya zzaala

Luñjamya abayizi okuzannya zzaala kye kitegeeza, ng'ozimbira ku ndowooza zaabwe ezitali zimu. Naye mu bufunze kitegeez okusiba ku kintu nti kinaaba, oba tekiibe kyokka ng'obukakafu bwa byombi, okuba obutaba, kwa kuteebereza. N'olwensonga eyo abayizi balina okumanya obuzibu obuli mu kwesigama ku kuteebereza obuteebereza ekintu ate ng'okisibyeko ne ssente, oba ekintu ekikaluu.



Ekyokukola 1. Okusoma

Abayizi basome ekitundu kino wammanga:

Olw'ebbulu ly'emirimu erikyase ensangi zino, abantu abasinga tebakyalina ssuubi olw'okuba tebakyasobola kwetuusaako byetaago ebisinga obungi. N'olwensonga eyo abavubuka bangi bettanidde nnyo okuzannya zzaala mbu bagezese emikisa gyabwe, nga basuubira nti bajja kwewangulira omudidi basobole okuwona olukookere lw'obwawu. Mu mu bye basinze okuzannyamu zzaala mwe muli okusiba emipiira (akapapula), n'okuzannya caanisi oba amatatu ag'essente.

Kyokka eby'emb i abasinga obungi ssente zaabwe zibafudde. Bw'oyitaayita ku nguudo z'omu Kampala obudde obw'olwegguloggulo osanga oli agamba munne "Eyo ttiketi nfu naawe!" kino nga kitegeeza nti ssente ze yasibyewo zimufudde.

Endowooza eno ey'abavubuka okwagala okugaggawala amangu ereese ebizibu bingi nnyo mu bo. Abavubuka bangi tebakyayagala kukola yadde obulimulimu obutono mwe bandiggye akasente akababeezaawo, abalala eby'okusoma kati bibawunyira zziizi, bangi beetuze oluvannyuma lw'okussa ssente mu kusiba emipiira ne zifiirayo, kw'ossa n'amaka g'abamu okusasika anti ng'omwami buli kasente kaafunawo alowoooza kimu kusiba mipiira omukyala n'abaana abeerabidde, n'ebizibu ebirala bingi.

Gavumenti mu kugezaako okuzza embeera mu nteeko, etaddewo amateeka agakugira abaana abatannaweba myaka 18 okuzannya zzaala, tekomye ku ekyo amakampuni ageenyigira mu mizannyo egirimu okuzannya zzaala n'egabinika omusolo, ssaako n'okussaawo ekkomo ku ssaawa ezirina okuzannyirwako zzaala, naye okutwaliza awamu abantu bangi balowooza nti okuzannya zzaala mwe bajja okuyita okugaggawala ekintu ekitali kituufu n'akamu.



Ekyokukola 2. Okuwandiika

1. Mu bibinja abayizi bakoleyo ebipande ebiriko obubaka obulabula abantu obuteenyigira mu kuzannya zzaala.
2. Luñjamya abayizi nga bawandiika ensonga lwaki gavumenti esaanye ewere okuzannya zzaala. Ensonga ezimu zikooneeddwako mu kitundu.

Ezimu ku nsona abayizi ze basuubirwa okuwa mulimu nga zino wammanga

- Okutaasa abaana abato baleme okuwubisibwa
- Okutangira abagwira okunyaga bannansi.
- Okwagazisa abavubuka okukola mu kifo ky'okulowooza okufuna eb'endola
- Okuleetawo obutebenkevu n'eddembe mu ggwanga
- Okutangira abaana okuva mu ssomero
- Okukendeesa ku bumenyi bw'amateeka

1.4: Olulimi lw'ebiyemizannyo



Ekyokukola 1. Okusoma

**Luñjamya abayizi nga basoma ekitundu ekibaweereddwa.
Kakasa nti buli muyizi yeenyigiramu:**

Ku ssaawa mwenda z'ennyini ez'olweggulo ttiimu y'essaza ly'e Ssingi n'eya Busiro zaayolekaganya obwanga mu kisaawe e Namboole. Luno lwe liali olusamba lw'akamalirizo olw'empaka z'emipiira gy'amasaza, era nga lwe lusalawo ani asitukira mu kikopo ky'amasaza.

Ddiifiri ng'anekedde bulungi mu kajoozi ke era ng'ayimiridde mu makkati g'ekisaawe, omupiira yaguggyako akawuuwo. Awo ne nkulabira abawagizi bwe bawaga wakati mu mitimima okubeewanika.

Abasambi bo entuuyo baali bazisaza bibatu era nga bw'obalaba olowooza nti mpozzi babayiридde mazzi anti nga bona obujoozi bwe bambadde bubeekutte ku mibiri.

Eddakiika asatu ez'ekitundu ky'omuzannyo ekisooka zaggwaako nga tewali alengedde katimba ka munne. Naye liba teriri busa omusambi nnamba kkumi n'emu owa Ssingi n'awereza ennyanda eyaleka ekisenge kya Busiro ng'ekiyuzizza kyokka omuzibizi wa Busiro n'afuba nnyo okulaba ng'omuteebi wa Ssingi tamuyitako ekintu ekyamuvirako okumukuba ekkuuli kyokka agenda okukola kino ng'omuteebi Mawejje amaze okutuuka mu ntabwe ya Busiro, n'ekyaddako ddiifiri kufuuwa ffirimbi nga bw'asonga mu bunnya bwa Busiro.

Kino kyali kitegeeza ssanyu eri ttiimu ya Ssingi, kuba baali balaba ggoolo ewedde emirimu.

Ekyamazima essuubi lya Ssingi lyatuukirira kuba Mawejje omuteebi waabwe bwe yakuba ppena buli muntu akatimba yakalaba nga keenyeeenya. Okuva awo abawagizi ba Ssingi baalaluka olw'essanyu, ekisaawe ne kicankalana. Newankubadde mu kitundu ky'omuzannyo ekyaddako ab'olugoba oluteebi aba Masaka baafuba nga bwe basobola okunoonya ggoolo ey'ekyenkanyi naye bambi tekyasoboka, era eddenge evvannyuma ligenda okukommontebwa nga Ssingi ebala ggoolo emu ate yo Masaka ng'erina kiiso kya mbuzi.



Ekyokukola 2. Okuwandiika

Luñjamya abayizi nga bawa amakulu g'ebigambo ebisaziddwako mu kitundu kye basomye. Osobola okubawa olukangaga luno wammanga ne balumaliriza.

Ebigambo :

Ekigambo	Amakulu
Olusamba lw'akamalirizo	Olusamba olusalawo omuwanguzi
Asitukira mu kikopo	Awangula
Yaguggyako akawuuwo	Yagutandika

1.5: Okuteekateeka/Okutegeka Omukolo

Enteekateeka y'omukolo

Abayizi balunjamye ku bukulu bw'okubeera n'enteekateeka y'ekyo ky'oyagala okukola bwe kiba kyakukuviiramu bulungi.



Ekyokukola 1. Okusoma

Luñjamya abayizi nga beekenneenya enteekateeka y'omukolo ebaweedreddwa

Essaawa	Ekyokukola	Akivunaanyizibwako
6:00-6:30 Ez'omuttuntu	Ttiimu eñjenyi etuuka	<ul style="list-style-type: none">• Omusomesa awala eby'emizannyo• Abakulembeza b'abayizi abakola ku olwo
6:30 – 7:30 Ez'olweggulo	Ttiimu eñjenyi n'ekyaza zifuna okumanyagana	abantu bona abaliwo
7:30 – 8:00 Ez'olweggulo	Kulambula ssomero	<ul style="list-style-type: none">• Omusomesa awala eby'emizannyo• Abakulembeze b'abayizi
8:00 – 10: 00 Ez'olweggulo	Omupiira gutandika	<ul style="list-style-type: none">• Ddiifiri• Abazannyi• Omusomesa awala eby'emizannyo
10:00 – 10:30 Ez'olweggulo	Okwogera kw'abantu ab'enjawulo	<ul style="list-style-type: none">• Omusomesa awala eby'emizannyo• Omukulu w'essomero
10:30 – 11:30 Ez'olweggulo	Kyamisana na kwabuka	<ul style="list-style-type: none">• Bonna abaliwo



Ekyokukola 2. Okwogera n'okuwuliriza

1. Luñjamya abayizi okumanya obukulu bw'okuba n'enteekateeka.

Mu bye bayinza okuwa mulimu bino

- Ebikolebwa okubeera mu budde.
- Kiyamba obutasaasaanya nnyo n'okwonoona ssente
- Buli muntu amanya ky'alina okukola.
- Kitaasa ebiseera
- Kiyamba obutaswaza bateesiteesi
- Omukola gutambula bulungi.

2. Luŋjamya abayizi okuzuula ebintu ebikulu ebitabula mu nteeekateeka okugeza ebiseera, ekirina okukolebwa, avunaaanyizibwa ku kirina okukolebwa n'ebirala.

Embalirira y'akabaga akakulisa abajambi ba ssingo okuwanguza empaka z'amasaza

Ebyokugula	Obungi	Ssente ze kigula	Omugatte
Emmere			
1. Amatooke	Enkota 5	Buli emu 25,000/=	125,000=
2. Omuceere	Kkiro 100	Buli kkiro 3,000/=	300,000=
3. Lumonde	Ensawo 01	150,000 /=	150,000=
Enva			
1. Ennyama	Kkiro 30	Buli kkiro 12,000/=	360,000=
2. Enkoko	Munaana	Buli emu 30,000/=	240,000=
3. Obutiko	Amatu 07	Buli ttu 5000/=	35,000=
Ebirungo			
1. Ennyaanya	Ekabbo 01	Buli kibbo 20,000/=	20,000=
2. Obutungulu	Ebisaaganda 05	Buli kimu 5000/=	25,000=
3. Obunzaali	Akakebe 01	Buli kamu 7000/=	7,000=
Ebyokunywa			
1. Amazzi	Bbokisi 02	Buli emu 20,000 /=	40,000=
2. Omwenge	Ebita 10	Buli kita 30,000/=	300,000=
3. Omubisi	Ebita 20	Buli kita 20,000/=	400,000=
Omugatte gwa ssente zonna			2,002,000=

Abagenyi abasuubirwa 300



Ekyokukola 3. Okuwandiika

1. Luñjamya abayizi okuyiga okulonda olukiiko oluteesiteesi, n'okuwandiika enteekateeka egobererwa okutegeka omukola nga balabira ku yabaweeddwa waggulu.
2. Era balunjamye ne mukukola embalirira.

1.6: Ebikulu ebikwata ku muntu mu bufunze

Nga tuwandiika ebikulu ebikwata ku muntu mu bufunze esira tulissa ku bintu ebikulu ebizze bibaawo mu bulamu bw'omuntu oyo gwe tuwandiikkako.

Abayizi bategeeze nti oluusi omuntu asalawo ye neyewandiikkako ebikulu ebimufaako. Oyinza okuavvuunulira enjawulo ya byombi mu Lungereza okusobola okufuna enjawulo eyo.



Ekyokukola 1. Okusoma

1. Luñjamya abayizi nga basoma ebikulu ebikwata ku muddusi Akii – Bua.

John Akii - Bua

Munnabyamizannyo John Akii – Bua yakulira mu maka ga baana 43 kitaawe be yazaala mu bakazi munaana. Mu 1968 yatandiirkiza okudduka emisinde gimubunabyalo ku mutendera gwensi yonna bwe yeetaba mu mpaka za Olympics kyokka n'atayitamu.

Wabula teyaggwaamu maanyi, mu 1972 yaddamu n'azetabamu era ku mulundi ogwo n'awangulira Uganda omudaali ogwa zzaabu, ng'amenye likodi. Emisinde yagiddukira eddakiika 47 n'obutikitiki 82.

Akii – Bua nga yali musirikale wa ppoliisi, omukulembeze w'eggwanga ebiseera ebyo Idi Amin Dada, yamulinnyisa eddaala n'amuzimbira n'ennyumba etemya ng'omuntu. Yaddamu n'akiikirira Uganda mu mpaka za Olympics mu 1980.

Akii – Bua yawañjangukirako mu Kenya oluvannyuma nga Amin Ayagala kumutta ate, kyokka ng'ali eyo aba Kkampuni ya Puma abaakolanga engatto ze yaddukirangamu baamuggyayo ne bamutwala e Bugirmaani n'akola nabo okumala emyaka ena.

Oluvannyuma yakomawo mu Uganda ng'omutendesi w'abaddusi b'emisinde gimubunabyalo. Akii – Bua yazaalibwa nga 3tu Ntenuvu 1949, n'afa nga 20ri Ssebaaseka 1997 ng'aweza emyaka 47; yaleka abaana kkumi n'omu. Erinnya lya Akii – Bua yafuuka enjombo mu Uganda etegeeza omuntu okudduka.



Ekyokukola 2. Okuwandiika

1. Abayizi balunjamye nga bawandiika ku munna byamizanno gwe bamanyi, kyokka kikkaatirize nti bye bawandiikako birina okuba nga bituufu, so si kuyiiya biyiye. Kino bakikole nga bali mu bibinja.

1.7: Okwewummuzuamu

Abayizi babuulire okwewummuzuamu kye kitegeeza. Omuntu okubaako ne kyakola mu biseera bye eby'eddembe. Kiyinza okuba;


- Okuzanya omupiira oba omuzanno omulala gwonna
- Okubeerako ku bubaga ng'obwamazaalibwa
- Okusoma ebitabo

- Okukyalira abeemikwano oba eñjanda
- Okulaba Terefayina
- Okunyumya ne banne ku mikutu gimugattabantu, n'ebirala

Obalage n'obukulu bw'okwewummuzaamu omuli;

- Okwogiwaza obwongo
- Okukola emikwano
- Okutumbula empisa n'obuwangwa
- Okumaya ku bifo ebipyá
- Abamu gifuuka mirimu gamba ng'okuyimba
- Okuggyawo ekiwuubaalo
- Okutumbula ebyobulamu mu bantu
- Okukendeeza ku kweraliikirira n'endwadde z'emitima
- Okutumbula ebitone, n'ebirala









Ekyokukola 1. Okwogera

1. Abayizi bannyonyolagane ebintu ebyakolebwanga edda n'ebikolebwa ensangi zino, nga boogera ku miganyulo egiri mu byombi.



Ekyokukola 2. Okusoma n'okuwuliriza

1. Luŋjamya abayizi nga basoma emboozi eno wammanga Kasule ng'ayogeraganya ne Nsamba, n'oluvannyuma bagizannyemu akazannyo

Okwogeraganya

Kasule: Nsamba, ogamba otya muganda wange?
Gyebaleko.

Nsamba: Sirina bigambo, mpozi ggwe.

Kasule: Sirina buzibu. Ekiбуuzo ky'omusomesa wakimalirizza?

Nsamba: Kibuuzo ki kazzi?

Kasule: Eh, weerabidde ekibuuzo kye yatuwadde tuwandiike emboozi nga tulaga akabi akali mu kunywa ssigala?

Nsamba: Bannange...! Nze mbadde mbyerabidde. Kasule nina ekizibu munnange, ky'ova olaba ne bye nkola tebikyakwataga.

Kasule: Kiki ekikutawaanya? Eka tebakuwa kadde kuwummulamu?

Nsamba: Nedda munnange obuzibu tebuli ku bazadde bange.

Kasule: Eeeh, obuzibu buli ki?

Nsamba: Munnange taata jjuuzi yampa ssente ez'ebisale by'essomero nzitwale mu bbanka naye mukwano gwange Kirabira n'aŋŋambा mbu tusobola okusooka ne tuzisibamu akapapula ne zizaala ne.....

Kasule: Katonda wattu! Ekiki? Ssente z'ebisale by'essomero wazizannyamu zzaala Nsamba?

- Nsamba:** Ekyamazima nange si kye nnali njagala, naye Kirabira yamatiza nti bwe tuzisiba ku mupiira gwa Man U ne Arsenal tuba tujja kufunamu ssente endala nnyingi nnyo.
- Kasule:** Eyo wakola nsobi muganda wange. N'eggulo tewasomye ng'oli mu ebyo bikutawaanya?
- Nsamba:** Munnange anti ntya omukulu w'essomero okundaba. Ajja kummanja ssente z'ebisale by'essomero nga sizirina, angobe ate olwo kannyinaze ka Nayiga kandoopeyo ewa taata.
- Kasule:** Ho! Oli mu buzibu sseruganda naye luno bw'oluyitako bambi ebyo tobiddangamu.
- Nsamba:** Oli mutuufu Kasule, weebale nnyo amagezi ago. Ekintu kimmazeeko emirembe. Kale tunaddamu enkya kambeeko bye nkola.



Ekyokukola 3. Okuwandiika

1. Luñjamya abayizi bawandiike ebirungi n'ebibi ebiva mu kwewummuzaamu.

Ebirungi ebimu byakooneddwako mu 1.6.

Ebimu ku bibi mulimu

- Okwetta
- Amaka okusasika
- Abayizi okulemwa okusoma
- Obwassemugayaavu
- Empisa envundu
- Ebyobuwangwa okusasika
- Obutakkaanya wakati wa bazadde n'abaana
- Entalo ezitatadde
- Obubenje ng mu mmotoka z'empaka n'ebirala.

1.8: Okuwandiika emboozi ey'okukubaganya ebirowoozo

Abayizi balunjamye nti mu bulamu mwe tutambulira kikulu nnyo abantu okuba nga tuwuliziganya. Buli awabeera abantu abangi bayinza okukkaanya ku nsonga oba obutakkaanya naye ekkyo tekiggyawo mpuliziganya wakati w'abantu abo. Yadde nga tokkirizaganya na ndowooza ya muntu, obeera oyagala omuntu oyo akutegeere, sinakindi akkiriziganye n'endowooza yo.

Bwe tuwandiika nga tuwa ensonga ze tukkiririzaamu era ze tulowooza nti ze ntuufu, era nga tugezaako okumatiza abalala nabo bakkiriziganye n'ensonga zaffe, emboozi egy'engeri eyo gye tuyita ey'okukubaganya ebirowoozo.



Ekyokukola 1. Okusoma

Luñjamya abayizi nga basoma ekitundu ekibaweeddwa.

“Kisaanyo omuntu okufuuweetera ssigala mu bantu?”

Abantu bangi bafuuwa ssigal nga bali mu bannaabwe naddala mu bifo eby'olukale nga bbaala, ebifo ewalabirwa katemba n'ebirala naye ekyebuuzibwa nti ekikolwa ekkyo ddala kituufu? Abantu bangi bayinza obutaba na kyakuddamu ku nsonga eyo kuba abamu balowooza nti ddembe lya muntu abamu balowooza nti ddembe lya muntu okukola ky'ayagala naye nze ηηjamba nti ekikolwa ekkyo tekisaanidde.

Ekisookera ddala ffenna tukimanyi nti okufuuweeta ssigala kirwaza, era ebirwadde nga kkookola w'amawuggwe biva ku kufuuweeta ssigala. N'olwekyo toyinza kulwaza bantu banno mu bugenderevu olw'okuba ggwe ssebo/ nnyabo olina eddembe lyo. Kimanye nti n'abalala balina eddembe okubeera abalamu ate obulamu tebugulwa.

Ekirala omuntu bw'atandika okunywa ssigala kiba kizibu okulekayo omuze ogwo. Bw'ofuuweetera ssigal mu bantu banno obayigiriza omuze gwo mu butali bugenderevu ate nga bwe gunaamala okubakwata kigenda kuba kizibu nnyo okugulekayo.

Ssigala oyo omunywere mu bifo eb'olukale aviiriddeko okufiirwa abantu n'ebintu nga kino kiva ku muntu anyway ssigala n'asuula obutundutundu obusignalira ku minwe gy'asigala nga bukyaliko omuliro ne bukwasa ebintu ebirala ebibulinaanye omuliro, n'ekivaamu gwe muliro okubuuuba wanna. Ebibira n'obutale bingi biyidde mu ngeri eno eggwanga ne lifirwa obutitimba bw'ensimbi olw'obulagajjavu bw'omunywi wa ssigala omu eyeerwoozaako yekka.

Ng'oggyeko ebyo waggulu, okufuuweetera ssigala mu lujjude kikosa n'obutonde bw'ensi, olw'ekikka ekyo kye bafuuwa ne ndutundu obwo obusignalira ku minwe gy'a ssigal, bwe bugenda mu ttaka terisigala kyekimu.

Okutwaliza awamu, okufuuweeta ssigala kisaanye kuwerebwa oba si ekyo abanywi ba ssigala babeeko ebifo ebyetongodde gye bamunywera.



Ekyokukola 2. Kuwandiika

1. Ng'abayizi bawandiika emboozи eno balunjamye ku nsonga omuwandiisi z'aleeta okumatiza abasomi be nti ddala okufuuweetera ssigala mu lujjudde kibi.

Ekyokukola ekiwumbawumba essuula:

“Ebintu ebyakolebwanga ab’edda okwewummuzaamu byaganyulanga nnyo abantu era ne leero byandiganyudde nnyo abantu okusinga ebikolebwa okwewummuzaamu ku mulembe guno”

Nga mukolera mu bibinja muwandiike emboozi ya bigambo 250-300 nga muwagira oba okuwakanya endowooza eyo waggulu.

Mu mboozi yammwe mufube mulabe nga mumatiza abatali ku ludda lwe muwagira bakkirize okutwala endowooza yammwe.

Ekyokukola ekiwumbawumba essuula

Engabanya y'obubonero

Ebigebererwa	Okunyyonnyola	Enkola 1	Enkola 2	Enkola 3
Omusone gw'embeezi empanvu	<p>1. Enyanjula wano alage ekwewummuaamu kyo kitogeeza, aweiseyo ku by'okulabirako by'ebikolebwa ekwewummuaamu</p> <p>2. Alage oludda lw'awagira</p> <p>3. Akozeso ku bisoko, engoro, obigambo ebigagga, n'enjogera.</p> <p>4. Okuwumbawumba</p>	Omuyizi akeze kimu ku biscuubirwa, (Obubonero 5)	Omuyizi akeze 2 oba 4 ku biscuubirwa, (Obubonero 09)	Omuyizi amazeeye byonna, (Obubonero 18)
Ekinyusi	<p>Omuyizi awagira, asuubirwa okuwa ensonga nga zino;</p> <ul style="list-style-type: none"> • Obumu • Mwoyogwa gewanga • Okwogiwaza obwongo • Okuleetawo enkolagana • Okutumbula ebitone • Obatalowcoleza nnyo mu byanfuna • Byakolebwanga kuwummula se si kufuuka mirimu 	Omuyizi awaddeko bicatu n'okudda wansi, obubonero (08)	Awadde wakati w'onsonga nnya n'omukaaga obubonero (14)	Abiwadde byonna oba n'okusingawo, obubonero (22)

Ebigobererwa	Okunyyonnyola	Enkola 1	Enkola 2	Enkola 3
	<ul style="list-style-type: none"> • Okuwa obukugu abo ababyenyigira • Kmu n'ebirala. Kyokka ye omuyizi awakanyaasuubirwa okulaga obukulu bw'ebikolebwa leerong'ayogera ku bino; • Bitumbula ebitone • Birimu okufuna ku sente • Bigaziwako okusinga oby'edda- bya nsi yonna • Bifunyisa abantu ettutumu • Bitumbula oby'enfuna by'abantu n'eggwanga • Bitondawo emirimu Bitabaganya amawanga n'ebirala 			
Empandiika entengole	<ul style="list-style-type: none"> • Omuyizi asuubirwa okuwandiika amaloboozi agawangaala n'okuggumira mu butuufu bwago, Okugoberera amateeka agafuga ennyukuta W ne Y, L ne R wamu ne Nakinyindwa 	<p>Omuyizi akoze ensobi munaana ku kkumi, ebubonero (02)</p>	<p>Omuyizi akoze ensobi mukaaga, ebubonero (04)</p>	<p>Omuyizi akoze ensobi nnya n'okudda wansi ebubonero (10)</p>
Omugatte gw'obubonero		(50)		



Essuula 2: Ebyobulambuzi eby;ennono

Ensoma 12

Oluvannyuma Iwe'essuula eno, osuubirwa okuba ng'osobola;

Ebigambo ebikulu

- Eby'obulambuzi
- Ennono
- Ensiko
- Okuyigga
- Amakuumiro
- Embu z'amannya
- Eby'omunsiko
- Olulimi Iw'ebyobulambuzi

- Okukozesa ebigambo ebyenjawulo ebyeyambisibwa mu byobulambuzi.
- Okuzuula amannya g'ebiomunsiko n'amakuumiro g'ebiomunsiko agasangibwa mu Buganda.
- Okuwa amannya agagwa mu Mbu ennya ezisooka kwekugamba(1MU-4MI).
- Okutegeera n'okumanya obukulu bw'ebifo n'ebintu eby'ennono mu Buganda.
- Okunnyonnyola emigaso n'okusoomoozebwba okuli ku makuumiro g'ebiomunsiko n'ebifo ebifundafunda abantu we bagenda okulaba ku byomunsiko.
- Okweyambisa omutimbagano okuzuula ebrisolo n'ebinyonyi byomunsiko ebyenjawulo amakuumiro mw'ebisangibwa.

Ensomesa

- Okuggyiisa ebisomesebwa mu bulamu bw'abayizi kikulu.
- Okwetabisa abayizi mu kunoonyereza ku bikwata ku bulambuzi obukyukakyuka ennyo ensanji zino.
- Okulambula amakaddiyizo n'ebifo eby'ennono abayizi bakwataganye byebasoma ne byebalaba.

2.1: Olulimi Iw'ebyobulambuzi



Ekyokukola 1. Okusoma

Mu kyasa kino eky'abiri mw'ekimu Bugannda ne Uganda, eby'enfuna byesigamiziddwa nnyo ku mulimu gw'ebyobulambuzi. Omulimu guno gutambilira ku bugagga bw'obutonde Katonda bwe yagonnomolera Buganda ne Uganda era obugagga buno busikiriza abalambuzi okuva e Bule n'e Bweya wano mu ggwanga n'ebweru waalyo. Abalambuzi ekibaleeta kulaba byabulambuzi, kwewummuzaako mu biseera byabwe eby'eddemebe, eby'emizannyo n'okwesanyusaamu nga bali mu bifo ebyobulambuzi.

Ekiba ekiddirira kiwumbawumba ebyobulambuzi mu Uganda. Luŋŋamya abayizi bakikyuse bakizze mu Luganda olutuufu nga beeyambisa ebigobererwa nga tukyusa ekiwandiiko.

Uganda, Africa's tourism hub

Uganda is among the top ten countries known for their rich tourist attractions. Uganda's variety of natural resources range from diverse wildlife, forests, mountains, water bodies and wetlands that support not only wildlife but also bird sanctuaries and human populations.

A number of Uganda's people live alongside these tourism features. They have preserved their cultural diversity as well as nature herself has, so that Uganda is now popularly known as a great tourist attraction at the heart of the African continent.

Uganda receives foreign tourists who come to enjoy viewing these attractions at a fee charged by the Tourism Board. Ugandans are encouraged to take part in indigenous tourism by charging them a subsidized fee.

Despite this consideration, Ugandans still shy away from enjoying the sites of their God-given natural tourism attractions even in this the twenty - first century.



Ekyokukola 2. Okuwandiika

Oteekwa okuluṇṇamya abayizi nga bakola bino;
Balondemu ebigambo ebirina akakwate ku byobulambuzi.
Okugeza: eby'obulambuzi, ebisolo by'omusiko, awalundibwa
ebinyonyi, eby'obuwangwa ebyenjawulo n'ebirala.

1. Babikozese mu sentensi ziggyayo obulungi amakulu kibayambe okulaga obumanyi bwabwe mu lulimi .

Olulimi Iw'ebiyobulambuzi.	Sentensi.
Ekyokulabirako; Ebisikiriza abalambuzi.	Uganda nsi eyaweebwa eby'obutonde ebisikiriza abalambuzi.
1.	
2.	
3.	

2.2: Eby'omunsiko bya Uganda

Wano, lunjnamya abayizi bazuule ebyomunsiko bya Uganda ng'ebisolo, ebinyonyi, ebibira n'omuddo ogubiyamba byonna bisikiriza abalambuzi. Lagira abayizi basome mu kitundu ekibaweeddwa wammanga.



Ekyokukola 1. Okusoma

Ekkula mu kkula ly'Africa

Bwali buwungeera buti ne tugoba bumale ku Apoka Resort Comp era bwe twali tuyingira tuti ekitundu, ne ndaba ensasi z'omuliro nga zidda ku mataala ga mmotoka yaffe. Okello eyali atulambuza yatunnyonnyola nti, 'Ago maaso ga mpisi ,bibe n'emisege. Gano ge matwale gaazo mwe ziyiggira eky'okulya mu lukoola luno ng'obudde buzibye."

Enkeera nga katonda abuggyeko eddiba ,twabukeereza nkokola okulya ekyenky a tulyoke twolekere ekiwonvu kye kkuumiro ly'ebiomunsiko li Kidepo nga ffenna tuli basanyufu ng'akimezezza okw'enjala.

Newakubadde obudde bwali bukyali bwa ku makya nnyossaawa ng'emu , enjuba yavaayo nga tulaba amagulu gaayo nga gayise ku lusozi Moroto wamma ggwe ng'erabika bulungi nnyo! Yali enyuma okulabako ng'etabise langi ya bbulu , kyenvu ne kipaapaali wamma ggwe netukakasa Iwaki Africa eyitibwa ssemazinga w'enjuba.

Ku ssaawa nga ttaano ezookumakya nga Apoka Resort Comp tugireseeko katono mu nsozi zetukubye amabega ,twagenda busimbalaala okutuusa nga tutuuse mu lusenyi olw'omuseetwe nga lusinga ne Lwera. Eyali atulambuza yatunyumiza nti gano gem aka g'ebisolo omuli ebika eby'enjawulo ebiri wakati w'ekinaana n'ekikumi (80-100) era nga byamanyiira bulungi embeera y'obudde mu kitundu kino..

Ekkumiro ly'ebiomunsiko lino lyebulunguddwa ensozi mu bukiika-kkono n'ebuvanjuba.Kwe kugamba ensozi zino ze zikola ensalo ya Uganda ne South Sudan mu bukiikkono era ne Kenya mu buvanjuba.

Ekkumiro ly'ebiomunsiko lino Kidepo litudde ku kitundu omuli emigga ebiri ; omugga omutono ogusangibwa mu kiwonvu ekiyitibwa Narus n'omugga omunene ogusangibwa mu kiwonvu Kidepo ekkumiro lino kwe lyaggya erinnya.

Twali tukyewuunya ebyo amaaso negatulaga eggana ly'entulege nga liva gye tugenda lidda gyetuva.Zaali zinyirira nga gy'obeera bazisiiga kazigo. Enjuba bw'enzaakako bweti n'olaba zimasaamasa ate nga bwezirigita. Bw'oziraba weewuunya Katonda eyatobeka lanji zaazo enjeru n'enzirugavu ne zinyuma zityo!

Omugoba wa mmotoka yasala ku misinde n'atulabula okuggala amadirisa gonna.Twagenda okukebuka tuti nga ku ggana ly'empologoma kwe tulaba nga mulimu enkulu n'obuto. Kino kyatulaga Iwaki entulege ziri zaatuyitako nga zidda muli zitaase obulamu. Eyali atulambuza yatugamba nti, 'Muli ba mukisa, kuba empologoma,engo n'ensolo endala ezigwa mu kika ky'ekimu tezikyalabika mu kitundu kino. Zeekuumira eyo mu nsozi waggulu eno zijjayo bbalirirwe okweyiggira ku ky'okulya.

Mu ttuntu twalambula Kidepo yenna ne tutuuka ku ogwakalira olwo ne tufunyamu okudda ku Apoka Resort Comp. Omukisa gwatukwata nga tukomawo ne tusanga abazinyi abazina amazina g'ekinnansi agazinibwa Abakaramoja nga bawasa. Twatunula ne twewuunya baana balenzi ne baana bawala nga bakunkumuka amazina aganyuma okufa obifi.

Abazinyi bano nabo basikiriza abalambuzi. Abakazi Abakaramoja bakyala abanyumirwa ennyo era abamanyi lanji n'ebikwata ku lanji.

Eggwanga ly'Abakaramoja nalyo kisikiriza abalambuzi. Ennyambala y'abakyal Abakaramoja abamanyi era abettanira ennyo lanji n'ebiruke ebinyirivu ennyo bye bateeka mu bulago, ku mutwe, ku mikono ne ku magulu. Abantu bano bamanyidde bulungi embeera z'olukoola luno nga bambadde amaliba amalungi agaawundibwa mu ngeri eyeekyewuunyo gy'otalabangako. Gawundibwako obubira bwa langi ezenjawulo enkyamufu. Gaawundibwa negasiibibwako amasavu wamma ggwe negagonda ng'olugoye Iwa liiri. Bino byonna byatunyumizibwa nnamukadde Akello lewontina eyali naye azze okunyumirwa ku mazina agaali gagenda mu maaso.

Era yagenda mu maaso n'atugamba nti bo abavubuka abalenzi beewunda bulungi buyirizi obulabika obulungi , ku mitwe nebassaako ebyoya by'ennyonyi eby'ebbeeyi ate nga bimanyifu nnyo ng'ebya Mmaaya. Omuzinyi bweyagiranga n'azina nga bw'alaga akakuufu ke mu bulago akaaliko erinnyo ly'empologoma oba ery'engo.Buli muzinyi mulenzi yazinanga n'akaggo ke akayooyoote obulungi mu mukono ogumu n'effumu erimasaamasa mu mukono omulala.

Nze nneewuunya nnyo abantu bano engeri gye babeera mu kifo kyekimu n'ebisolo byomunsiko mu ddembe mu kiwonvu kya Kidepo. Amangu ago obwongo bwandeetera ekirowoozo nti Kidepo weebeeredde bwetyo, kiri kitya mu makuumiro amalala amatongole agali mu Uganda agawerera ddala kkumi bwe ddu n'ebiyobulambuzi ebigajjudde.

Nalowooza ku kkumiyo ly'e Mbuula, ery'e Muhamula n'ennyanya ezigalimu ng'ebimuli ebyetoolooovu ne ntambuza ebirowoozo nzuuyo ku gabira agakutte bwe ppo ppo ppo mu kkumiyo lye.



Ekyokukola 2. Okuwandiika

Luñjamya abayizi nga baddamu ebibuuzo ebibaweeddwa ku kitundu kye basomye waggulu nga:

1. Bamenya ebifo anyumya mu kitundu bye yaalambu era bannyonyole ne bwebifaanana.
2. Bamenya ebisikiriza abaalambula mu kkuumiro ly'ebiomunsiko eryogeddwako mu kitundu kye basomye.
3. Bawa amakuumiro g'ebiomunsiko amalala agoogeddwako mu kitundu kye basomye.
4. Bawa enjawulo wakati w'ekkumiyo ly'ebiomunsiko mu ggwanga n'obufo obufundafunda omukuumirwa ebyomunsiko okwanguyiza abantu okubirambula.
5. Bajjuza olukangaga olulaga ebyomunsiko mu Uganda ne wa webisangibwa okubiraba. Olwokuba baakweyambisa mutimbagano bakwataganye n'ekitongole kya tekinologiya mu ssomero.

Eby'omunsiko	Ekkuumiro we bisangibwa



Ekyokukola 3. Okusoma

Luñjamya abayizi nga basoma ekitontome ekibaweeddwa wammanga:

WAMPISI

Wampisi otambula osooonooka ki

Ng'oyigga ekiriibwa

Olulala n'okongoja

Ng'omukunku ayeekoonye.

Olingiza wano na wali

Ofune ggwe ky'oyiikiriza

Obukirabuukira nebiri ebusukka

Ng'olina enswera enaabojja.

Ennyindo n'ozitikka


Nga sseddume enaaweesa

Mbu okonga lusu

Ky'oyigga n'okirondoola

Bw'okigwa mu buufu

Enseko ne zikubuna amatama





Ekyokukola 4. Okuwandiika

Luṇṇamya abayizi nga baddamu ebibuuozo bino ebibaweeddwa ku kitontome kye basomye waggulu;

1. Bannyonnyole engeri empisi gy'etambulamu okusinziira ku sitanza esooka.
Bannyonnyole empisi byekola ng'enoonya ky'eneerya.
Bannyonnyole engeri empisi gyekolamu ennyindo ng'ewunyiriza kyeyigga.
Balage empisi kyekola ng'efunye ky'enaalya okusinziira ku sitanza eyookusatu
2. Luṇṇamya abayizi bazuule olulimi olugergeranya oluli mu kitundu 'Ekkula mu kkula ly'Afrika' ne kitontome 'Wampisi' bye basomye , bawandiike sentensi ttaano nga buli emu erimu okugerageranya.
3. Luṇṇamya abayizi baleete ebisoko ebirimu okugerageranya nga bikozesa akagambo 'nga' nga biva ku byomunsiko ebiragiddwa mu lukangaga luno wammanga
4. Luṇṇamya abayizi bayige obuyiiya mu kuwandiika bayizi bawaandiike ekitontome ku kintu kyomunsiko kye beesiimidde. Ekitontome ekyo kyebawandiise bakisomere bannaabwe mu kibiina nga bali wamu

Ebyomunsiko	Ebisoko ebirimu akagambo 'nga" akagergeranya
Empologoma	
Enjovu	
Entulege	
Entugga	
Ekibe	
Empisi	
Empungu	
Mmaaya	
Ejjuba	
ηŋjaali	
Essalambwa	
Enkima	
Goonya	

Enwera	
Enfudu	

2.3: Okuyiga ku Mbu z'amannya mu Luganda



Ekyokukola 1. Okusoma

Luñjamya abayizi bategeere ebikwata ku Mbu ennya(1MU-4MI) ezisooka zetutunuulidde mu kitundu kino.

Embu z'amannya kitegeeza ebika by'amannya agatumibwa abantu oba ebintu ebyenjawulo.Mu Luganda tulina embu abiri mu ssatu (23). Embu zino zisibuka mu lulimi Lugereeki.

Mu ssomo lino abayizi bajja kuyiga ku mbu nnya ezisooka (1MU-4MI) era ze zino wammanga:

1. MU 2. BA 3. MU 4. MI

1 MU

Mu lubu luno mugwamu amannya ga ngeri ttaano(5);

- (i) Mugendamu amannya g'abantu agoolukale n'ag'enkalakkalira.

Okugeza:

Agoolukale

Muwala

Mulenzi

Musajja

Mukazi

Ag'enkalakkalira:

Ssempijja

Mwesigwa

Yozefu

Lwanga

Bbaadiru



Ekyokukola 2. Okuwandiika

- (i) Mugendamu ebitiibwa ebiweebwa abantu olw'ebifo oba olw'emirimu gya bakola

Okugeza:

Kabaka

Katikkiro

- | | | |
|--|-----------|-----------|
| Kaggo | Mininsita | |
| Pulezidenti | Mulamuzi | |
| (ii) Mugendamu amannya g'ebintu ebigandawaziddwa | | |
| Okugeza: | | |
| Wambwa, | Wammese | Wampisi |
| (iii) Mugendamu amannya agamu ku mmere nga; | | |
| Muwogo, Kasooli, balugu, kaama n'endala. | | |
| (iv) Mugendamu amannya g'endwadde ezimu nga | | |
| Mulangira | Mukenenya | Ssennyiga |
| Yegu | Kawaali | |

2 BA

Muno mugendamu amannya g'abantu gonna agali mu 1 MU nga gazziddwa mu bungi.

3 MU

Muno mugendamu amannya agatandika n'enningo mu naye nga gali mu bumu nga.

Muyembe	Musota	Mukyere
Musomo	Mutuba	Muguwa
Mulyango		

4 MI

Muno mugenda amannya gonna agali 3 MU naye nga gazziddwa mu bungi .

Okugeza :

Miyembe	Misota
Mikeeka	Miguwa

2.4: Ebifo n'ebintu eby'ennono



Ekyokukola 1. Okusoma

Lagira abayizi basome ekitundu ekibaweeddwa wammanga ekikwata ku muti Nakayima:

Illustration: 1. A picture of Nakayima tree

Nakayima omuti ogw'ebiyewuunyo

Omuti ogwakula ne guwola , mwagaagava ate ogwawanvuwa ne gulangajja.guwaniiddwa agalandira agaakula ne gawola mu bunene kumpi kwenkana nduli ya Nakayima yennyini. Omoti guno gusangibwa mu ssaza lya Ssaabasajja kabaka ery'e ssingo mu disitulikiti y'e Mubende nga waakavaako katono mu kabuga k'e Mubende.

Bw'otuukawo olaba obupande obuliko ebiragiro ku ki ky'oteekeddwa oba ky'otateeekeddwa kukolera mu kifo kino.Bwotuuka mu kifo kino osabibwa okuggyamu engatto n'obutawowogganiram. Bw'oba okola ekikututte toteekeddwa kutataaganya balala. Mu kifo kino mulimu b'osangamu nga bakola ebintu ebyenjawulo ng'okukuma mu byoto abalala banywa mmindi abandi bagalamidde bawummuddemu.

Oluba okussa ekigere kyo mu kifo kino ng'omwami abalambuzi akwaniriza n'akamwenyumwenyu ku matama bw'amala okukulamusa ng'akubuuza olulimi olukwanguyira ku Lungereza n'Oluganda anti ye ennimi zombi azikuba budinda.

Kasita omugamba nti Luganda ng'alyoka alukuvira ku ntono.

Agamba nti omuti guno gwasimbibwa muka Ssekabaka Ndawula eyayitibwanga Nakayima emyaka nga bina egiyise. Era n'ettaka kwe gw'asimbibwa lyaweebayo Ssekabaka Ndawula. Ssekabaka ono bwe yakisa omukono, mutabaniwe Wamala n'alya ejnjoma.

Nakayima gwe muti omumanyifu mu miti egisikiriza abalambuzi mu Buganda. Gumanyiddwa nti gulimu amaanyi agenjawulo nga n'omusambwa gwa Ndawula mwegutuula era eno y'ensonga Iwaki guwangadde ekyenkanidde awo. Gwatuumibwa Nakayima olw'okuba eyagusimba yali ayitibwa Nakayima.

Nakayima bwe yasimba omuti guno yagwagala nnyo era yagukuumanga butiribiri. Nakayima teyakoma kw'ekyo kyokka n'omuzimu gwa bba yagusamiranga awo ku muti guno. Abantu abaalwalanga kawumpuli bajjanga n'abavumula. Nakayima yavumulanga n'endwadde endala nnyingi abasawo abalala mu Buganda zebaalemwanga. Nakayima yagabanga n'emikisa n'okuwaenzaalo.



Ekyukukola 2. Okuwandiika

Luñjamya bulungi abayizi nga baddamu ebibuuzo bino wammanga ebiraga oba basomye ne bategeera kye basomye;

1. Abayizi bawe endagiriro wa omuti gwa Nakayima we gusangibwa.
2. Abayizi bawe bibiri ebiragiro ebigobererwa abalambuzi abagenda okulambula Nakayima.
3. Abayizi bawe ensonga Iwaki Abaganda bakuumye omuti guno emyaka egyo gyonna nga bagwenyumirizaamu.
4. Abayizi bamenye ebintu ebikolebwa mu kifo kino nga bisikiriza abalambuzi nga baggyeeko omuti gwa Nakayima.
5. Luñjamya abayizi nga bakozesa omutimbaganano n'enkola endala esoboka mu ssomero bazuule ebifo byobulambuzi eby'ennono ebisangibwa mu Buganda balage n'amasaza mwebisangibwa.

Ekifo ky'ebiyobulambuzi eky'ennono	Essaza
1. Ennyanga za Walumbe e Ttanda	Ssingo
2. Ennyanja ya Kabaka	
3. Ebiyiriro by'omugga Ssezzibwa	
4. Amasiro ga Bassekabaka e Kasubi	
5. Obutaka bw'ekika kyo	
6. Ekiggwa ky'Abajulizi e Nnamugongo	
7. Twekobe e Mmengo	

6. Luñjamya abayizi bajjuze ekipande ekibaweeddwa nga balaga ebantu eby'ennono ebisangibwa mu maka g'omugonda n'emigaso gya byo egypt'ennono

Ekintu eky'ennono	Emugaso gwakyo ogw'ennono.
Eñjoma	Ekubwa nga wali akabi akagudde mu kitundu(eno eyitibwa ggwanga mujje) Ekubwa okukunga abantu bakole bulungibwansi.(eno eyitibwa saagala agalamidde)
Engabo	
Effumu	
Ekabbo	
Endeku	



Ekyokukola 3. Okwogera n'okuwuliriza

1. Luñjamya abayizi nga bazannya akazannya wakati w'omulambuzi n'alambuza ng'omulamwa guli obukulu bw'ekifo ky'ennono ekisinga okuba n'essomero lyabwe.
2. Leka abayizi akazannya bakazannyaire bannaabwe mu kibiina ng'obalaba.



Ekyokukola 4. Okuwandiika

Lunjamya abayizi bawandiike emboozzi ya bigambo bibiri mu ataano ng'ekwata ku bifo eby'ennono mu Buganda.

2.5: Emigaso n'okusoomoozebwa okwolekedde enkuuma n'enkozesza y'ebyomunsiko ennungi



Ekyokukola 1. Kusoma

Uganda okukula ng'eyita mu byobulambuzi

Mu kawefube wa Uganda okutuuka ku ddaala ly'amawanga agali yaddeyaddeko omwaka gwa nkumi bbiri mu ana (2040) we gunaatuukira yeesibye nnyo ku bulambuzi ng'oggyeko amakubo amalala.

Okutuuka ku kiuubirirwa kino gavumenti etemye empenda nnyingi nga n'okutumbula ebyobulambuzi mw'okutwalidde.

Minisitule y'ebyobulambuzi nga yensaale, ebitongole bingi ebitondeddwawo okukulaakulanya ebyobulambuzi mu ggwanga. Tulinawo Uganda wildlife. Ng'oggyleeko amakuumiro g'ebiomunsiko ana, ekitongole kya Uganda wildlife Authority kitonzeewo era ne kikakasa obufo obufundafunda obukola ng'amakuumiro aganguyira abantu okugenda ne balambula ebyomunsiko. Kino kyakolebwa bwe kityo kubanga bannansi abasangibwa mu bifo bya Uganda ebyo baali bafuukidde ebyomunsiko ekyambika; babiyigga okubirya, okubiggyako amasanga n'ebi'omuwendo ebirala. Obufo buno busangibwa eyo mu masosso g'ebyalu mu Uganda nga Bokora mu Karamoja, Kabwoya mu Hoima ne Kyambura mu Bushenyi.

abantu bayigganya ebyomunsiko olw'ensonga nti ebitundu by'emibirgy'ebisolo by'omunsiko bikozesebwa ng'eddagala so nga ebirala nabyo biyigganya abantu nga bibalya oba okubaliira emmere. Obufo obwo obumu busangibwa mu bibuga nga bwetulina Entebbe Wildlife Education Centre e Entebbe. Empenda za gavumenti zino zivuddemu ebibala kuba abalambuzi bazze beeyongera mwaka ku mwaka era omulimu gw'obulambuzi gulimu abakozzi abali eyo mu bukadde kkumi nga mwobalidde abakugu ennyo n'abatali. Abalambuzi beeyongedde okuva wano mu ggwanga n'ebweru wa Uganda. Amakuumiro g'ebiomunsiko gazimbiddwa, ebifo by'okwewummuzaamu, ebisulo by'abagenyi, eby'emizannyo ng'amaato n'emmotoka z'ekirambuzi. Ekisanyusa nti abakola mu bifo bino baana bannansi abasomye ne bafuna obukugu n'abataasoma naye nga balina kye bamanyi ku by'obulambuzi.

Wetwogerera bino ,Uganda efuna abalambuzi obukadde butaano okuva ebweru w'eggwanga ebafunamu akawumbi kamu n'obutundutundu bubiri (1.2). obukadde obuli eyo mu lwenda mu asatu (930) buddizibwa mu ziddisitulikiti awasangibwa amakuumiro gano neziyambako neziyambako mu byenkulakulana.

Bannansi ababeera mu bifo awasangibwa amakuumiro gano nabo basikiriza abalambuzi. Si lwakuba nti obutonde bwabwe n'ebiomunsiko bye baliraanye balina bingi bye bafaanaganya ng'endaga buttoned.

Ekyokulabirako be Batwa n'ebisodde ebisangibwa mu bibira by'e Bwindi, Abakaramoja mu kkuumiro lyebyomunsiko ery'e Kidepo n'ekika ky'Abasinga mu Bwindi.

Oyinza okwebuuza nti abantu bano babaddewo batya ebbanga eryo lyonna ne mirirwana gyabwe ego?

Ng'oggyeko okusojjogana olw'emmere n'ebifo awasulwa, abantu bano baamanyiira embeera eno era basanyufu nti eyo we waabwe. Obuwangwa bwabwe buyambyeko okukuma ebisolo by'omunsiko. Okugeza Abatwa bawanuza nti omuntu bw'aba agenda okuyigga nga ezzike aba akubiddwa ekisiraani era okuyigga akuvaako buvi kw'olwo. N'Abasinga mu Bwindi balina endowooza y'emu era tebalya mazike. Ng'oggyeeko okusoomoozebwa Uganda kwesanga mu kukuuma n'okukozesa ebyomunsiko n'obulambuzi obulungi, esuubirwa okwesigama ennyo ku mulimu guno okugaggawaza abatuuze baayo mu kyasa kino eky'abiri mu ekimu.



Ekyokukola 2. Okuwandiika

Luñjamya abayizi baddemu ebibuuzo ebibaweeddwa ku kitundu kyebasomye waggulu

1. Bannyonyole ebintu Uganda byesuubira okukozesa okutumbula eby'enfuna bya bannayuganda omwaka gwa nkumi bbiri mu abiri(2020)we gunaatuukira.
2. Bannyonyole empenda gavumenti zeetemye okukuma n'okukozesa ebyomunsiko obulungi nga bwe bimenyeddwa mu kitundu kye basomye.
3. Abayizi bawe ensonga Iwaki bannansi abaliraanye amakuumiro g'ebiomunsiko ba bulabe eri ebisolo byiomunsiko.
4. Abayizi bannyonyole engeri bannansi ababeera mu kifo kye kimu n'ebiomunsiko gyebakisoboddemu.
5. Abayizi beeyambise omutimbagano n'enkola endala yonna esoboka mu ssomero banonyereze bye bayinza okujjuza mu lukangaga olubaweeddwa nga lulaga obufo bw'ebiomunsiko obufundufunda (reserves, sanctuaries and zoos) gye busangibwa mu Uganda

Erinnya ly'akafo	Gye kasangibwa



Ekyokukola 3. Okwogera nokuwuliriza

1. Luñjamya abayizi ng'obatadde mu bibinja bya bana bana bafune olufumo nga lulimu ensolo nga bbiri.
2. Lagira omuyizi omu mu kibinja afumire banne bwebali mu kibinja.
3. Abayizi olufumo lwa bwe balufumiremu bannaabwe mu kibiina ekyawamu.



Ekyokukola 4. Okuwandiika

1. Luñjamya abayizi nga bawandiika ekipande ekiriko obubaka obukugira okuyigga okumenya amateeka.

Okugeza :

EKIRANGO

Tokkirizibwa, kuyigga mu kifo kino, tokkirizibwa kutambuza muliro oba ebintu ebikwata amangu omuliro, tokkirizibwa kutambula na bissi ng'emmundu.

Ekkuumiro ly'ebisolo ku kizinga ɳjamba

(UGANDA WILDLIFE AUTHORITY)

Ebirina okuba mu mu kirango.

(ii) Obubaka

(iii) Abuwa oba gye buva

(iv) Obufaananyi

5. Luñjamya abayizi obalage engeri y'okuzimbamu ekirowoozo.
 - (i) Bamenye ensonga mukaaga zonna nga ziwigira omulamwa.
 - (ii) Bamenye ensonga ttaano zonna nga zitawagira mulamwa.
3. Luñjamya abayizi nga bawandiika emboozzi ya bigambo nga bibiri mu ataano ku mutwe ogugamba nti,” Okukuumma ebyomunsiko tekitugasizza.”

Ekyokukola ekiwumbawumba essuula

Ekibiina kyammwe kyakwetaba mu kukubaganya ebirowoozo okutegekedwa Uganda Wildlife Authority nga bali wamu ne Uganda Tourism Board mu kawefube w'okukubiriza bannansi okujjumbira okulambula eby'obulambuzi ebiri mu bitundu byabwe ku mulamwa ogugamba nti,

“Okutumbula ebyobulambuzi eby'esigamye ku nnono kiyinza okuleetera Uganda obugagga obusinga n'obuva mu makolero.”

Ebigobererwa

- Mukolere wamu mu kibinja nga mukola okunoonyereza.
- Mukubaganye ebirowoozo ku bye mujje mu kunoonyereza.
- Mwegabanye buli omu afune by'anaakubaganyako ebirowoozo mu lukunjaana.

Ebinaakuyambako

1. Mwebuuze ku basomesa bo n'abayizi b'ebibiina ebirala. Mu gendako mu ttereketo ly'ebitabo muzuuleyo ku bigambo eby'amagezi ebyayogerwa abaatuusooka ku nsonga yeemu n'emiwendo eginawagira ensonga zo zibe nga zikkirizikika.
2. Mweyambise omutimbagano munooanye ebintu ebirungi ebiyinza okukolebwa mu mulimo gw'okukuumma ebyomunsiko n'okufuba gavumenti kwekoze.

Ekyokukola ekiwumbawumba essuula: okukubaganya birowoozo

Engabanya y'obubonero

Ebisuubirwa	Okunyyonyola	Olipimo olusocka	Olipimo olw'okubiri	Olipimo olw'okusatu
Endabika	Okulaga ennyambala etuukiridde nga bambala unifoomu y'essomero.	Okusikiriza abawuliriza olw'ennyambala ya yunifoomu ennungi (akabonero kamu 01)	Okusikiriza abawuliriza olw'ennyambala ennungi oya yunifoomu y'essomero. (obubonero bubiri 02)	Okuskiriza abawuliriza olw'okulaga ennyambala ennungi oya yunifoomu etukula n'engatto enkubo eddagala obulungi (obubonero bubiri 02)
Enjogera	Okwogera nga weekakasa	Okukozesa obulungi siteegi, okumenya ab'ebitiibwa abali mu bawuliriza n'okwelianjula obulungi. (akabonero kamu 01)	Okukozesa obulungi siteegi, okumenya ku b'ebitiibwa abali mu bawuliriza, okwelianjula n'okwekkasa omulamwa oguli mu ddiro. (obubonero bubiri 02)	Okukozesa siteegi obulungi, okumenya ku b'ebitiibwa abali mu bawuliriza, okwekkasa omulamwa ogukubaganyizibwako ebiroweeze n'okusika ebiroweeze by'abawuliriza (obubonero busatu 03)
Ekinyusi	Okumanya omulamwa mu bujuvu,	Nnyonyola wakiri ensonga ssatu (obubonero bubiri 02)	Nnyonyola wakiri ensonga nnya ezigwiridde (obubonero busatu 03)	Okukozesa eddoboozi eriwulikika nennyimirira ennungi esikiriza abawuliriza (obubonero buna 04)

Ebisuubirwa	Okunnyonnyola	Olupimo oluseeka	Olupimo olw'okubiri	Olupimo olw'okusatu
Okuwulikika	Okufuga eddoboozi; okulirinnyisa, okulissa oba okulireega.	Eddoboozi libe lya kigero naye nga liwulikika ekimala (akabonoro kamu 01)	Okwogera ng'owulikika nga n'emisinde gya kigero (ebubiri 02)	Okwogera ng'owulikika nga n'emisinde gya kigero n'okufuga eddoboozi ng'olissa, ng'olirinnyisa oba okulireega obulungi. (ebubonoro busatu 03)
Okugoberora a-amateeka g'olulimi.	Laga obumanyi bw'olulimi nga weeyambisa ebigambo eby'enjawulo	Nnyonnyola wakiri ensonga ssatu n'obigambo ebyenkizo (ebubonoro bubiri 02)	Nnyonnyola wakiri ensonga nnya nga weeyambisa ebigombo ebyenkizo ebigendera kukubaganya ebirowooze (Obubonere bubiri 02)	Nnyonnyola ensonga ttaano nga ziggya ku kubaganya obirowooze. (obubonero buna 04)
Omugatte awamu				Obubonero 21



Essuula 3: Ebika

Oluvannyuma Iw'essuula eno omuyiziasuubirwa okuba ng'osobola;

- Okumenya ebika ebisangibwa mu Buganda.
- Okunokolayo ebika n'emiziro gyabyo.
- Okutegeera embu z'amannya okuva ku lubu olw'okutaano okutuuka ku lubu olw'ekkumi (5-10).
- Okuwandiika ebbaluwa eyita omuntu ku mukolo.
- Okunokolayo ebiwanuuzibwa ebiri mu Buganda.
- Okukuba mu kyapa ebbaluwa eyita omuntu ku mukolo ng'okozesa kompyuta.

Essuula mu bufunze

Mu ssuula eno osuubirwa okuyamba abayizi bamanye ennono y'ebika byabwe n'ebika bya Buganda byonna okutwalira awamu. Abayizi era basuubirwa okuyiga okuwandiika ebbaluwa oba kkaadi eziyitaabantu ku mikolo. Mu ssuula y'emu abayizi bajja kuyiga ku mbu z'Amannya (5 -10).

3.1: Ennono y'ebika



Ekyokukola 1. Okusoma

Abayizi basome ekitundu kino wammanga:

Ebika by'Abaganda bye bibiina by'abantu Abaganda ebyagunjibwaho edda, ebirimu abantu ab'omusaayi ogw'enda emu n'obujjajja obumu. Abaganda, ekika bakiitwala nga kintu kikulu nnyo era abantu ab'ekika ekimu tebasobola kukola bufumbo.

Okusookera ddala, waliwo ebika bitaano (5) kintu bye yajja nabyo mu Buganda ebiyitibwa "binnansagwa." Ebika ebyo bye bino wammanga;





Bino byagenda byeyongerako okutuuka ku bika ataano mu bitaano bye tulina kati. Buli kika kirina obubonero busatu obukyawula ku birala:

- Omuziro (kuno kugenderako akabbiro)
- Amannya
- Omubala

Buli kika mu Buganda kitambulira ku bufuzi bwa mitendera mukaaga nga bwe kiragiddwa wammanga:

- Owaakasolya
- Abaamasiga
- Abeemituba
- Abennyiriri
- Empya
- Ennyumba / Amaka

Ebika bya mugaso nnyo mu Buganda kubanga bireetawo obumu mu Buganda, eky'okulabirako, buli mwaka obwakabaka bwa Buganda butegeka emipiira gy'ebika ekiyamba mu kwongera okugatta abantu.

Buli kika kirina amannya ag'olulango agakyawula ku bika ebirala, wadde nga waliwo amannya agamu agasobola okutuumibwa mu bika ebibiri okugeza; erinnya Nnamirimu lituumibwa ab'ekika ky'ennyonyi n'ekika ky'engabi. Amannya agatumibwa abawala agasinga gatandika n'ennyingo "Nna".

Buli kika kirina ebigambo byakyo ebyagunjibwa, ebyogerwa enjoma nga bagikuba mu ngeri eyitibwa “omubala”. Ebigambo by’emibala gyonna tebifaanagana, naye nga bigenderera okweraga oba ekika ekimu okulaga nti kye kisinga ekirala. Emibala gino batera okugikuba ku mikola nga egy’okwalula abaana/ abalongo, okwabya olumbe n’emirala.


Ebika bya mugaso nnyo mu Buganda kubanga bireetawo obumu mu Buganda, eky’okulabirako, buli mwaka obwakabaka bwa Buganda butegeka emipiira gy’ebika ekiyamba mu kwongera okugatta abantu.

Buli kika kirina amannya ag’olulango agakyawula ku bika ebirala, wadde nga waliwo amannya agamu agasobola okutuumibwa mu bika ebibiri okugeza; erinnya Nnamirimu lituumibwa ab’ekika ky’ennyonyi n’ekika ky’engabi. Amannya agatuumibwa abawala agasinga gatandika n’ennyingo “Nna”.

Ekigambo “muziro” kiva mu kikolwa “okuzira” ekitegeeza okukyawa. Si kyangu kukakasiza ddala engeri emiziro gye gyatandikamu naye buli kika kirina omuziro gwakyo. Abaganda beenyimiriza nnyo mu miziro gyabwe era nga kizira omuntu okulya omuziro gwe. Emiziro egimu gyawulwamu amatabi ag’enjawulo okugeza ennyonyi, waliwo ab’eddira ennyonyi Nakinsige n’abeddira ennyonyi ennyange.

Buli kika kirina ebigambo byakyo ebyagunjibwa, ebyogerwa enjoma nga bagikuba mu ngeri eyitibwa “omubala”. Ebigambo by’emibala gyonna tebifaanagana, naye nga bigenderera okweraga oba ekika ekimu okulaga nti kye kisinga ekirala. Emibala gino batera okugikuba ku mikola nga egy’okwalula abaana/ abalongo, okwabya olumbe n’emirala.

Ekigambo “muziro” kiva mu kikolwa “okuzira” ekitegeeza okukyawa. Si kyangu kukakasiza ddala engeri emiziro gye gyatandikamu naye buli kika kirina omuziro gwakyo. Abaganda beenyimiriza nnyo mu miziro gyabwe era nga kizira omuntu okulya omuziro gwe. Emiziro egimu gyawulwamu amatabi ag’enjawulo okugeza ennyonyi, waliwo ab’eddira ennyonyi Nakinsige ennyange, enkusu ne nnamuŋŋoona.



Ekyokukola 2. Okuwandiika

Abayizi baddemu ebibuuzo ebibabuuziddwa mu bibinja:

1. Abayizi bannyonyole amakulu g'ebigambo bino.
 - (i) Omuziro
 - (ii) Ekika
 - (iii) Omubala
2. Bannyonyole ebintu ebyawula ekika ekimu ku kirala.
3. Bawandiikeyo amannya 5 ag'abawala n'agabalensi 5 okuva mu bika byabwe.
4. Bagabane ne bannaabwe mu bibinja ebirala.
5. Abayizi bawandiike ebika Buganda kw'ezimbiddwa.
6. Nga bakola basatu basatu;
Abayizi bakubaganye ebirowoozo ku bukulu bw'emiziro n'emibala gy'ebika byabwe.
7. Luñjamya abayizi nga beekenneanya olukangaga luno wammanga n'oluvannyuma baddemu ebibuuzo ku lwo.

Ssebyala	Mayega	Namuyomba
Namuyanja	Nakanwagi	Ssaka
Nazziwa	Lubega	Nakacwa
Ssemmanda	Ssemugaanyi	Nannyonga
Nabukenya	Ssembuusi	Nalubega
Namuyiga	Nannyombi	Muyanja
Ssemuganyi	Muyomba	
Ssennyonjo	Ssebulime	Namuyiga
Namatovu	Muwonge	Nanyonjo
Sseguya	Kasozi	
Nabulime	Nabbona	
Nabukeera	Kyeyune	
Ssengonzi	Nabukeera	

Nga bakola babiri babiri;

- (i) Basengeke amannya ago okusinziira ku bika mwe gagwa.
- (ii) Baawule amannya g'abawala ku g'abalenzi
- (iii) Balage obubonero obubayambye okwawula amannya g'abawala ku g'abalenzi ng'osinziira ku ago agakuweereddwa mu lukangaga.

3.2: Embu z'Amannya

Mu ssomo eriwedde (Eby'obulambuzi obw'ekitundu) abayizi baasoma ku mbu z'amannya olusooka okutuuka ku lw'okuna (1-4). Mu ssuula eno bajja kuyiga ebikwata ku mbu z'amannya, okuva ku lubu olw'okutaano okutuuka ku lwekkumi (5-10).

Bajjukize nti, embu z'amannya ziraga engeri amannya gye gategekebwamu nga gasinziira ku kye gaba gategeeza. Entegeka eno terina kukyusibwa. Embu z'amannya ziri abiri mu ssatu (23).

Embu z'amannya ttaano okutuuka ku kkumi (5-10) ze zino wammanga.

5 LI

6 MA

7 KI

8 BI

9 N

10 N

Luṇjamya abayizi ku mannya agayinza okuyingira mu buli lubu mu ngeri ng'eno wammanga

- Mu lubu 5 LI mugendamu amannya agatandika n'enningo "LI" naye nga gali mu bumu okugeza; liiso, linnyo, lyenvu, lyato n'amalala agamu gatandika n'enningo eya nnabansasaana okugeza ddebe, ssavu etc.
- Olubu 6 MA mugendaamu amannya nga gali mu bungi. Amannya gano gaba gavudde mu lubu 5 LI okugeza; Maaso, Manyo, Maato n'amalala.
- Mu lubu 7 KI mugendamu amannya agatandika n'enningo ki naye nga gali mu bumu. Eby'okulabirako; kumi, kigagi, kikajjo, kisubi, kikopo n'amalala.
- Amannya agagwa mu lubu 8BI geego agaba gavudde mu lubu 7 KI naye nga gali mu bungi. Galina kutandika n'enningo "bi". Eby'okulabirako; bimu, bikajjo, bigagi, bisubi n'amalala.
- Mu mbu 9N ne 10N mugendamu amannya agatandika n'enningo "N", enjawulo eriwo nti amannya agali mu lubu 9N gaba mu bumu ate agali mu 10N gaba mu bungi. Enjawulo eno era esobola okuleetebwawo Nakasigirwa endazi.

Eby'okulabirako;

9 N

Nte eno

Nkoko eno

Mbuzi eno

Ngatto eno

10 N

Nte zino

Nkoko zino

Mbuzi zino

Ngatto zino



Ekyokukola 1. Okusoma

Soma ekitundu kino wammanga.

Nneenyumiriza mu muziro gwange

Obuovo bw'omuntu, eggwanga lye n'ekika, bye bifuula omuntu okuba ki kyali mu mbeera ey'obuwangwa n'ennono.

Buli ggwanga lirina obuvo bwalyo, abantu bonna mwe bava, obwo bwe bulyawula ku mawanga amalala.

Kyokka amannya, emiziro (muno mugenderamu n'akabbiro) n'emibala bye bintu ebizimbirwako ekika. Buli kika kirina okuba n'omuziro, ku muziro guno kwogatta akabbiro.

Mu bika by'Abaganda mulimu ensolo, ebinyonyi, ebiwuka wamu n'emmere.

Eby'okulabirako; ekika ky'enseenene, ekika ky'engabi, ekika ky'embwa, ekika ky'ekkobe, ekika ky'ente n'ebika ebirala

Nze n'eddira nseenene naye sigirya era sigikombako, wadde nga njagala nyo naye nkimanyi bulungi nti kizira omuntu okulya omuziro gwe.

Ensibuko y'emiziro temanyiddwa naye Abaganda b'edda, abaatandika ebika, kigambibwa nti ebintu bye baalyanga ne bibakola bubi oba ne bibalwaza, baalekarengaawo okubirya era ne babyewalira ddala. Muno mwe bajja ebyo bye baafuula emizizo gyabwe. Omuntu yayinzanga okulya ekikajjo, eryenvu, enkoko, ennyama y'omusu oba ekintu kyonna ne kimukola bubi, olwo teyaddangamu kukirya! Yayinzanga okufuna ebirogologo n'asiiyibwa omubiri n'aba ng'alumiddwa ekiku, oba enjuki oba ayokeddwa ekisaanyi.



Ekyokukola 2. Okuwandiika

1. Nga bakola babiri babiri,
 - a) Bakoppole amannya agasaziddwako mu kitundu.
 - b) Basengeke amannya ge bakoppolodde nga bagateeka buli limu mu lubu mwe ligwa.
 - c) Balage enjawulo eriwo wakati w'embu zino;
5 LI, 7 KI, 9 N ne 6 MA, 8 BI ne 10 N.

Ebimu ku bye bayinza okuwa mulimu nti amannya ag'olubu olumu bw'ogazza mu bungi gakola olubu oluddako.

- a) Bawandiikyo amannya abiri abiri aga buli lubu 5Li okutuuka ku 10N

2. Abayizi basengeke amannya gano wammanga nga bagyisa mu mbu zaago mwe gagwa;
- | | |
|-------------|-------------------|
| a) Kisero | j) Kisanirizo |
| b) Kibbo | k) Matama |
| c) Kisaanyi | l) Bijanjaalo |
| d) Masasi | m) Mpuuta (bbiri) |
| e) Nsowera | n) MBAATA (emu) |
| f) Nkumbi | o) Linnyo |
| g) Lyato | p) Nsuwa (nnya) |
| h) Bibbo | q) Ngege (emu) |
| i) Mannyo | r) Kirevu |

3.3: Ebbaluwa eyita omuntu ku mukolo

Abayizi balunjamye nti omuntu ayinza okuyita omulala ku mukolo ng'akikola mu buwandiike, oba okumuyisa omumwa. Wano bagenda kuyiga okuyita omuntu ku mukolo mu buwandiike.

Ebitabula mu buwandiike obw'engeri eno mulimu bino:

- Endagiriro y'awandiika
- Ennaku z'omwezi
- okulamusa
- Ensonga eyisa omuntu oyo
- Ennaku z'omwezi omukolo lwe gunaabeererawo
- Ab'okutuukirira singa ayitiddwa taasobole
- Omukono gw'awandiise
- Amannya



Ekyokukola 1. Okusoma

Soma ekitundu kino wammanga:

Ab'enju ya Mwami Kironde baabukeereza nkokola ku lunaku lwa wangu bonna nga batonnya mmooli ne boolekera oluguudo lwe

Mukono. Baganda ku kijaguzo ky'okuweza emyaka amakumi abiri mwetaano mu bufumbo. Mukwano gwe Kalega Samson ye yamuwa ebbaluwa emuyita ku mukolo ogwo.

Okuyitibwa ku mukolo kuyinza okuba okwa kaadi, ebbaluwa oba okwogera obwogezi. Naye bwe kubeera ok'ebbaluwa, waliwo ebintu ebitalina kusuulibwa muguluka ku bbaluwa eno, okugeza; endagiriro y'omuwandiisi, ennaku z'omwezi (ebbaluwa Iw'ewandiikkidwa wamu n'ezo omukolo lwe gugenda okubeerawo), ekifo, ensonga ekuyisizza n'ebirala. Egimu ku mikolo egyetaaga okuyitibwa n'ebbaluwa gye gino .

- Embaga
- Ebijaguzo
- Enkiiko
- Ennyimbe n'emirala



Ekyokukola 2. Okusoma

Weekenneenyne ebbaluwa eno wammanga.

BUTOZI MEDICAL CENTRE
AKP 4938
MASAKA
23/12/2019

Eri Mukyala Luzz,

Ens. Okuggulawo eddwaliro

Ku Iw'olukiiko olutegeka okuggulawo eddwaliro lya Butozi Health Center, oyitibwa n'essanyu lingi okubeerawo ku kuggulawo eddwaliro lya Butozi health centre ku Iw'omukaaga nga 30/12/2019. Tukusaba oyogereko eri abantu baffe ku ddwadde.

Abamu ku bagenyi abayitiddwa mwe muli Dr Balwolera akulira eddwaliro lye Kyabakadde, Dr Sarah Opindi minister w'ebi'obulamu ebisookerwako. Dr Kalinaki okuva mu ddwaliro lye Mulago, Dr Aliddeki okuva mu ddwaliro lye Kitovu wammu n'omubaka wa palamenti ow'ekitundu kyaffe Hon. Edward Ssekandi.

Omukolo gujja kutandiika ku ssaawa ssatu ez'okumankya nga guggulwawo minister w'ebi'obulamu Dr Balwolera mu butongole. Patriko Mukuuko yajja okuba omwogezi w'omukolo ogwo.

Tulina essuubi nti ojja kutweyungako ku mukolo ogwo.

Nze akussaamu ekitiibwa,

Ssali Lwanga

Damu eri: Kyeswa Henry: 0775442649



Ekyokukola 3. Okuwandiika

Luŋjamya abayizi nga baddamu ebibuuzo bino wammanga .

1. Nga bakola babiri babiri,

- a) Bamenye abantu abakulu abayiddwa ku mukolo.
- b) Omukolo oguyitiddwako abantu mukolo ki?
- c) Bawe ensonga enkulu eyisizza omugenyi omukulu.
- d) Singa omuntu taasobole kubaawo ku mukolo,
aweereddwa bantu ki ab'okutuukirira?
- e) Abayizi bawe essaawa omukolo we
gunaabeererawo, n'ekifo gye gugenda okubeera..
- f) Balage ebintu ebitalina kubula mu bbaluwa eyita
omuntu ku mukolo

Mu bibinja,

- a) Abayizi bawandiike ebbaluwa eyita mukwano
gwabwe ku mukolo gwamatikkira.
- b) Bagabane ne bannabwe bye bawandiise.

A picture of learners on a computer seen typing a letter

Ekyokukola 5. Okukoza Tekinologiya

Nga bakola babiri babiri;

1. Balunŋamye bawandiike ebbaluwa eyita bazadde baabwe ku mukolo gw'ebiyobuwangwa ku ssomero lyabwe.

3.4 Ebiwanuuuzibwa

Mu Buganda, okugunjula abaana kutandikira ddala ng'abaana bakyali bato, ggwe ate towulira olugero olugamba nti, akakyama amamera..... Edda abakulu baateekangawo embeera eyaleeteranga abaana ouyiga era n'okuwa ebintu ekitiibwa. Embeera eno yabeerangako etteeka, ebivaamu singa oba omenye etteeka eryo era n'eky'okuyiga bbo kye beesirikiranga.

N'olwensonga eyo, ebiwanuuuzibwa ge mateeka ab'edda ge baateera ngawo abaana okugoberera, n'obukwakkulizo obwagenderangako. Kino kyayambanga abaana okweyisa obulungi era n'okuwa ebintu ekitiibwa.

Eky'okulabirako:

“Omwana omuwala talinnya muti”, mbu bwagulinnya gukala. Naye ekyagendererwanga mu kino kwe kukuma ekitiibwa ky'omwana omuwala jjukira ennyambala yaabwe yabeeranga nnyangungu.

Eby'okulabirako by'ebiwanuuuzibwa;

Etteeka	Ekivaamu	Eky'okuyiga
1. Omwana omulenzi tatuula ku kinu	Alwala empanama	Kukuma buyonjo
2. Toyogera na mmere mu kamwa	Amannyo gavaamu	Butakuba bantu mmere
3. Omwana omuwala tafuuwa luwa	Azaala omwana ow'omumwa omusongovu	Kwewa kitiiibwa
4. Omulenzi takomba ntamu	Tawasa	Butaba na mululu
5. Tebeera kiro	Ofuuka omusezi	Kwewala kusuula bintu eby'omugaso
6. Tosekula kiro	Obeera mulogo oba musezi	By'osekula biyinza okugwamu ebiwuka ebitambula ekiro

7. Tofumbisa muti kwa ntula	Oba weeyitira njala	Entula nva, n'olwekyo bw'ofumbisa emitula oja kwemalako enva
-----------------------------	---------------------	--



Ekyokukola 1. Okwogera n'okuwuliriza

1. Nga bakolera mu bibinja;
 - a) Abayizi banoonyerezeeyo ebiwanuuzibwa ebirala 10.
 - b) Buli bamu balage bannaabwe bye bazudde.
 - c) Bayambeko okulaga obukulu bw'ebiwanuuzibwa
 - d) Balunjamye okutegeera amagezi agali mu biwanuuzibwa.

Ekyokukola ekiwumbawumba essuula

Omusomesa wo ow'olulimi oluganda akusabye owandiike ebbaluwa eyita omukulembeze wa Nkobazambogo okuva mu ssomero eribaliranye okwogera eri abayizi abakola olulimi oluganda ku mutwe ogugamba nti, “Ensibuko y’ebika by’Abaganda”. Wandiika ebbaluwa eyo.

Engabanya y’obubonero

Ebisuubirwa	Okunyyonnyola	Enkola 1	Enkola 2	Enkola 3
Omusono	Omuyizi awandiike ng’agoberera bino; <u>Endagiriro</u> y’awandiika, <u>Ennaku</u> z’omwozi’ <u>Okulamusia</u> , <u>Ensonga</u> mu bufunze, <u>okulambulula</u> ensonga, <u>ekinkumu</u> , <u>amannya</u> <u>g’awandiika</u> .	<u>Omuyizi awandiise n’agoberera bibiri byokka ku ebyo, obubonero (02)</u>	<u>Omuyizi agoberedde bina ku byo, obubonero (04)</u>	<u>Omuyizi abimazeeyo obubonero (08)</u>

Ebisuubirwa	Okunnyonnyola	Enkola 1	Enkola 2	Enkola 3
Empandiika entongole	Omuyizi agoberore amateeka agafuga empandiika y'Oluganda entongole; okugeza enkozesza ya L ne R, Wne Y, okuwangaala, okuggumira, n'ebirala.	Omuyizi atagoberedde mpandiika yaddo, akabonero (01)	Aguddemu ensobi ssatu, obubonero (03)	Aguddemu ensobi omu, obubonero (05)
Ekinyusi	Omuyizi asuubirwa okulaga bino mu kulambulula ensonga ze; Olunaku, Essaawa, Ekifo, Abayitiddwa abalala' Ensonga eyisizza abantu, Abookutuukirira singa omuyite tasobodde kubaawo, n'ebirala	Alazeeko ebibiri byokka, obubonero (04)	Awaddeko ebina, obubonero (08)	Omuyizi amazeeyo byonna obubonero (12)





Essuula 4: Okubanga obugagga obw'ensibo

Ensoma 12

Oluvannyuma Iw'essuula eno, omuyizi asuubirwa okuba ng'asobola

Ebigambo ebikulu

- Obugagga
- Nnakongeza linnya
- Okubanga
- Obwavu
- Ensimbi
- Okutereka
- Amagoba
- Entandikwa
- Engero
- Ebitontome
- Ebisoko

- Okwongera okutegeera ebikwata ku bugagga.
- Okunnyonnyola amakubo eg'enjawulo obugagga mwe buyinza okufunibwa.
- Okunnyonnyola engeri obugagga gye buyinza okukozesebwba obulungi oba obubi.
- Okukozesa nnakongeza linnya ezisaanidde mu kunnyonnyola obugagga.
- Okunokolayo engero, ebitontome, ennyimba, wamu n'ebisoko ebikwata ku kugaggawala n'okwavuwala.
- Okuwuliriza oba okulaba ebikwatiddwa ku butambi ebikwatagana n'okugaggawala.

Esuula mu bufunze

Essuula eno yeekenneanya obugagga ng'ekintu buli muntu ky'alina, noolwekyo buvunaanyizibwa bwo okuluŋŋamya omuyizi okukizuula nti alina obugagga era nga kimukakatako okubwongerako n'okubukuuma wamu n'okubukozaesa mu ngeri ennungi ezza amagoba awatali kubwonoona. Essuula eyongerako okwerula engeri entuufu n'enkyamu obugagga gye bufunibwamu. Bw'onooba osomesa essuula eno, kikulu nnyo okussa omulaka ku nkозesa ennungi eya nnakongeza linnya mu ngeri eyokugeraageranya ensonga ez'enjawulo.

Bye weetaaga

Kuŋŋaanya ebifaanananyi by'abantu abakola emirimu egy'ejawulo omuli okusiba enviiri, okutunda edduuka, okubajja, okukuba amatoffaali, okwoza emmotoka n'emirala. Emiko gy'empapula z'amawulire egy'enjawulo n'obutabo obukwata ku byenfunu nabyo bukulu nnyo. Essimu esobola okukwata amaloboozi n'okuwulikika mu kibiina nayo ya mugaso. Osobola n'okukozesa ebikwatiddwa ku butambi.

Ensomesa

- Okunnyonnyola ensonga ezikwata ku bugagga kikulu nnyo.
- Okukozesa embeera eya bulijo kya nkizo nnyo mu kunnyonnyola ebikwata ku bugagga abayizi ne babitegeera
- Ojja kukozesa enkola eyookukwataganya ebisomesebwa okuyamba omuyizi okutegeera olulimi olukozeseddwa mu ngeri ennyuvu.

4.1: Obugagga



Ekyokukola 1. Okusoma

Ekitundu kino kigendereddwamu okwerula amakulu g'ekigambo 'bugagga' noolwekyo yamba abayizi okutegeera amakulu gaakyo wamu n'ebika byabwo nga weeyambisa ebyokulabirako ebiweereddwa.

Luriŋŋamya abayizi okusoma ekitundu kino:

abantu abasinga obungi balowooza nti ssente zokka bwe bugagga naye eno engeri nfunda nnyo mu kulowooza ku bugagga. Obugagga buzingiramu ebintu byonna ebikukwatako okugeza ebyobulamu, okumanya, enkolagana n'abantu, ebintu ebikalu by'olina, ebyensimbi n'ebirala bingi. Noolwekyo, newaakubadde ensimbi nkulu nnyo naye zikolako ekitundu kimu kyokka ekiyitibwa obugagga.

Obugagga mu by'ensimbi bukwatagana n'okusobozi okunyimirwa ebyo by'oyagala mu budde w'obyagalira era n'oyo gw'oyagala naddala mu kusaasaanya ensimbi.

Enkolagana gy'olina n'abantu nayo ngeri ya bugagga. Buli muntu wa mugaso era wa muwendo mu ngeri emu oba endala. N'oolw'ensonga eyo, kikulu nnyo era kya mugaso okukwatagana n'abantu abalala.

Embeera y'omubiri gwo ennungi naddala ebikwatagana n'obulamu, nakyo kya bugagga. Omubiri gwo okubeera nga mulamu bulungi, kikulu nnyo kubanga gwe musingi okuzimbirwa obugagga obulala bwonna. Okujjako ng'oli mulamu, toyinza kufuna bugagga bulala bwonna. Y'ensonga Iwaki omuntu bw'afa, ebyobugagga bye bisikirwa ne bikozesebwab abo abakyali abalamu. Tekyewuunyisa nti waliwo engero nnyingi ezikwatagana ku bugagga. Ekyokulabirako, Omuganda agamba nti, 'Obulamu bwe bugagga' n'ayongerako nti, 'Otulo tw'okumakya y'ensibuko y'obwatu'. Obugagga obw'ebintu ebikalu bwo bukolebwa ebintu eby'omuwendo bye tulina ng'ettaka, ente n'ebintu ebirala ng'ebidduka ebigwa mu ttuluba eryo.

Obugagga buyinza okuba obw'omuntu ssekinnoomu singa buba bubwe yekka, ova obw'eggwanga singa buba bwa nsi yonna okutwalira awamu.



Ekyokukola 2. Okwogera n'okuwuliriza

Yamba abayizi okuddamu ebibuuzo bino nga bali mu bibinja:

1. Mukubaganye ebirowoozo ku makulu g'ekigambo bugagga.
2. Nga mukozesa ebyokulabirako munokoleyebika by'obugagga eby'enjawulo
3. Munnyonnyole enjawulo eriwo wakati 'w'ensimbi' 'n'obugagga'.

4.2: Okubangawo obugagga obw'ensibo

Eno y'engeri y'okussaawo n'okwongera ebyobugagga by'omuntu oba eggwanga ebitwaliramu ensimbi n'ebintu ebikalu. Luñjamya abayizi okutegeera nti okubanga obugagga kutwala ebbanga so tekugwa bugwi kibwatukira.



Ekyokukola 1. Okusoma

Kubiriza abayizi okusoma ekitundu kino:

Mukasa omugagga omuto

Erinnya lyange nze Mukasa Benidicto. Nazaalibwa mu maka amafunampola omuli abakazi abangi ng'obwavu butukooza kagiri. Kitange yali mukomazi ssaako n'okuluka emiguwa mu bugoogwa. Ebyo bye yatundanga mu katale n'afunamu obusimbi nga kye bwamusobozesa okukola kyokka kwe kutuweererako akatono.


Bwe nnamalirirza pulayimale, kitange yali tasobola kumpeerera ekyo ne kinviirako okuwanduka mu ssomero omwaka ogwo.

Mu mwaka ogwo nnasalawo okunoonya ensimbi nga nkola emirimu egya lejjalejja ku ssamba ya Mwami Katongole eyali omulimi omututumufu ennyo mu kitundu.

Nga ndi ku ssamba yo, naweebwanga kkatala z'emimbii ez'enjawulo nga bansasula ssiringi bitaano buli yaadi ekkumi n'ebbiri zennalimanga. Omwaka bwe gwaggweerako nnali nsobodde okutereka ensimbi ensaamusaamu ezansobozesa okweyongerayo okusoma ssiniya.

Nga mpita mu buzibu bw'ebiensimbi obuyitirivu nnasobola, okutuula ssiniya eyookuna.

Okusobola okufuna ebisale by'essomero ebyo, nnapakasanga mu ggandaalo ly'Olwomukaaga ne Ssande ssaako ne mu mpummula. Embeera eno gye nnayitamu okutuuka bwe nnamalako ssiniya. Mu luwummula olwo nga mmaze ebibuuzo eby'akamalirizo, nnakozesa ensimbi zennafissa ku bisale by'essomero okugula ensigo z'ennyanya ze nnasimba mu kibanja ky'awaka.



Mu kiseera ky'amakungula, nnazitunda ne nfunu amagoba amalungi ddala. Ensimbi ze nnafunamu nazikozesa okugula ensigo z'ennyanya endala era n'ensimba n'ennaanansi mu kiseera ky'okusiga ekyaddako. Ennaanansi bwe zaakula, nnatandika okuzitundira ku kigaali.

Ensimbi ze nnafuna mu mu nnyaanya n'ennaanansi zaali zikubisa mu ze nnassaamu emirundi mingi ddala. Nnayongera okugaziya omulimu gwange era ne ntandika okupangisa abantu okunkolerako. Bye nnakungulanga byawerera ddala olwo ne ntandika okubisaabazanga ne mbitunda mu butale obunene e Kampala.

Ensimbi ze nnafunangamu zaagenda zeeyongerako okutuusa lwe nnagula loole yange eyasooka era mu bbanga lya myaka esatu, nnali mmaze okugula loole endala bbiri ezaasaabazanga ebyamaguzi byange okubitala mu mawanga ag'omuliraano omuli Sudan ey'omu maserengeta ne Congo.



Ensimbi ze nnafunangamu zaagenda zeeyongerako okutuusa lwe nnagula loole yange eyasooka era mu bbanga lya myaka esatu, nnali mmaze okugula loole endala bbiri ezaasaabazanga ebyamaguzi byange okubitala mu mawanga ag'omuliraano omuli Sudan ey'omu maserengeta ne Congo.



Amagoba mu bintu bino byonna gansobozesessa okugula ettaka agawerako kwe nzimbye ebizimbe bingi ekipangisibwa ssaako n'ekkolero ly'omubisi oguva mu bibala. Mmanyi nti bangi ku mmwe kati munneegomba naye okutuuka wano we ndi kivudde mu kwewaayo n'okukola obutaweera



Ekyokukola 2. Okwogera n'okuwuliriza

Osaanidde okukubiriza abayizi okuddamu ebibuuzo bino mu bigambo byabwe:

1. Ggwe nga ssekinnoomu kiki ky'otwala ng'ekyobugagga ekikyo ku bubwo ky'olina mu bulamu bwo?
2. Tottolera banno abali mu bibinja engeri gye wafunamu ekyobugagga ekyo.

Engeri y'okufunamu obugagga

Luñjamya abayizi okuwa endowooza yaabwe ku bintu eby'enjawulo ebikolebwa okunoonya obugagga mu kitundu kyabwe. Beera mwegendereza okubalaga ebyo ebirungi era ebikkirizibwa n'ebyo ebitakkirizibwa.

Balambike mu kusoma ekitundu kino.

Buli muntu ali ku nsi alina ebyobugagga. Ekyawukana kyokka gwe mutindo n'obungi bwabyo. Enjawulo eno ewaliriza bangi okubiwenja obuseenene. Abantu abamu nga balafuubana okufuna ebyobugagga, bakozesa amakubo amalambulukufu kyokka abalala bayita mu makyamu. Tusaanye okujukira nti obulamu bwo bwennyini bwe bugagga obusookerwako.

Amakubo amalambulukufu agayitibwamu okugaggawala gatwaliramu emirimu okugeza ebyobusuubuzi, okulima, okuyikula ebyobugagga eby'omuttaka, okukuba amatoffaali ssaako n'emirala mingi.

Ku luuyi olulala, waliyo amakubo g'okugaggawala agatali malambulukufu omuli okukuba zaala, obwamalaaya, obukumpanya, obubbi, okulya enguzi, obwa kkondo n'ebirala bingi.



Ekyokukola 3. Okuwandiika

1. Abayizi nga bali mu bubinja mwebasomera, bakubirize okuwandiika enkalala ezaabwe ku bwabwe eziraga engeri y'okufunamu obugagga:
 - a) Ekkirizibwa
 - b) Etakkirizibwamu kukola obugagga ng'oggyleeko byo ebinokoddwayo waggulu.

Londako

2. Nga ssekinnoomu, bawandiike ku muntu omwavu lunkupe gwe bamanyi era bawe ensonga lwaki tebamwegomba.

Oba

Bakozese olupapula lumu, okuwandiika ku muntu omu omugagga gwe bamanyi era bawe ensonga lwaki bamwegomba.



Ekyokukola 4. Okusoma n'okuwandiika

1. Wa abayizi omuko gwa Pakasa ogufulumira mu lupapula Iwa New Vision beekkaanye emboozi y'omuntu ayogeddwako bagitegeere bulungi
2. Biki bye bayiga okuva mu mboozi y'omuntu oyo.

4.3: Nnakongeza linnya

Nnakongeza linnya kye kigambo ekyongera okunnyonnyola omuntu oba ekintu ekirala okugeza kinene, kimyufu ne mugezi.

Nnyikiza amakulu ga nnakongeza linnya n'omulimu gw'ekola ng'osoma akatundu kano:

Bwe tubeera nga tunyumya ne bannaffe, kikulu nnyo okunnyonnyola obulungi ensonga gye twogerako tusobole okutegeerekeka obulungi. Ebigambo bye tukozesa okuttottola oba okwongera okuwa amakulu amannya oba ekintu kyonna kye twogerako, bye biyitibwa nnakongeza linnya.

Ekyokulabirako:

Mu mboozi eno:

Walusimbi asiika chapati eziwooma.

Ekigambo ekisaziddwako, eziwooma, ye nnakongeza linnya. Kituyamba okutegeera obulungi omutindo oba obuwoomu bwa chapatti za Walusimbi.

Ebyokulabirako ebirala ebya nnakongeza linnya bisaziddwako mu mboozi zino wammanga:

- Ekitabo kyo kya bbeeyi okusinga ekyange.
- Miria mugazi mulungi naye ayonoona nnyo obudde.
- Jajja yategeka ennyaanya ze ku mmeeza mu ngeri esikiriza.
- Abaguzi abakadde tebakymulugunya.
- Musunda mata waffe leero azze kikeerezi.
- Musawo Luyiga muwuliriza mulungi eri abalwadde be.
- Mikayiri aguze ebbaafu eya bbululu.
- Musoke ye mutunzi w'edduuka omuyombi.
- Kano ke katale akasinga obuyonjo mu kitundu kyaffe.
- Tulina abapangisa abagagga ku mayumba gaffe.
- Obuyonjo bw'effumbiro lye bubuusibusibwa.
- Oluguudo Iwa bisirikko y'ensonga Iwaki ebyamagazi ebimu byonoonese.
- Shalom mukyala mukakaalukanyi.
- Kato muyiiya nnyo.



Ekyokukola 1. Okusoma

Kubiriza abayizi okusoma ekitundu kino n'obwegendereza:

Emma ye yali mukwano gwange nfiira bulago naye ate nga mwavu nnyo nnyini ddala n'okusinga. Emyaka gyawerako nga tuli mu bwavu obuzibu ne tutuuka okubwetamwa. Twali tetulina ssente naye twasalawo okutandikawo akalimu akatonotonoto akateetaaga ntandikwa nnene. Twatandika kusiika kabalagala n'okumutunda. Twakaluibirirwa nnyo okufuna akatale kubanga kabalagala waffe teyali wa mulembe. Twatandika na n'abaguzi batono ddala ne tufuna okufiirizibwa okunene ennyo bo abagagga kwe bayinza okulaba ng'okutono.



Embeera yaffe ey'ensimbi yeeyongera okufeeba okumala akabanga ne tulowooza n'okubivaamu. Mu kiseera ekyo twakendeeza kubungi bwa kabalagala naye nga muwoomu mugonvu okusinga oyo eyali atundibwa mu maduuka amagundiivu agaali gatuliraanye. Mu ngeri y'okusendasenda abaguzi, twasalawo okuwa ennyongeza abo abaagulanga mu bungi. Mu kaseera katono twatandika okuvuganya n'amaduuka amanene.

Amagoba ge twafuna twagenda tugongeramu era ne twongera okutereka akatono ke twafissanga mu kittavvu eky'ekyuma kye twakola mu kikebe ekikalu ekyali ekikadde. Ekikebe kyali kinene ddala era twasalawo okusuulangamu ebinusu buli lunaku okutuusa lwe twaweza ensimbi ennyingi ddala. Oluvannyma twaggulawo ekirabo ky'emmere mu kifo bbaasi we zituukira era abantu we babeeranga okukeesa obudde.

Obumpwankimpwanki abaguzi bye baasinganga okwettanira ye ssumbusa ow'Ekifirika ssaako ne chapatti Enfalansa.

Zo loolekisi zaffe ze zaali zisinga obuwoomu mu kibuga kyonna era nga zisikiriza abaguzi abangi. Twakifuula kikulu nnyo okubudaabuda abaguzi baffe ekkyo ne kifuula ekirabo kyaffe ekifo ekisinga obulungi awaliirwa emmere mu kibuga.



Mu kiseera ekkyo, twatandika okufumba emmere ku mikolo era ne tugula n'emmotoka ennene eyatutambuzanga mu bifo awaabeeranga emikolo egy'enjawulo. Emikolo gino okusinga gyalinga gyaa mbaga, kwanjula, matikkira n'okuziika. Twavanga wano nga tudda wali anti olwo nga tulina oluseregende lw'emikolo okutuuka ku ssa ery'okuba ng'emyezi egiwera buli ggandaalo lya wiiki tulinako emikolo.

Mu kiseera ekyo twawandiisa bizinensi yaffe nga kkampuni eyeetongodde era nga tukozesa abakozi bangi ddala: abakulu n'abato, abaasoma n'abataasoma n'abalala bangi kasita baabeeranga nga bakola ekyo kye tubasuubiramu. Amagoba gaffe geeyongera okuva mu nkumi okutuuka mu bukadde.

We twogerera ffe bannannyini wooteeri entutumufu ennyo eyitibwa Basooka kwavula esangibwa ku luguudo Iw'e Masaka. Wooteeri eno ya mulembe nnyo era kati ffe basajja bannaggagga b'omu kitundu so nga ffe twali abaavu lucoolo ku muliraano awo.



Ensangi zino tutegeka emisomo egy'enjawulo mwe tubuulirira era n'okuzzaamu amaanyi abavubuka abaagala okugaggawala nga tubakubiriza okukola ennyo, okukola emirimu gyabwe n'obwegendereza era n'okubeera n'ebirooto ebinene. Tubategeeza nti mu nsi ya bizinensi, gy'okoma okusiga ensimbi gy'okoma okufuna amagoba era nti omwangu yatta enswa.



Ekyokukola 3. Okuwandiika

Kubiriza abayizi okulondobamu nnakongeza linnya 20 kitundu ekyo waggulu era baziwandiike mu lukalala.

4.4: Enkozesa y'obugagga ennungi n'embi

Obugagga buyinza okuviiirako omuntu okubeera obubi oba obulungi okusinziira ku ng'yabukozesa.



Ekyokukola 1. Okusoma

Kubiriza abayizi okusoma ekitundu kino wammanga:

Eyali binojjo afuuka lunkupe

Ng'omuyuzi eyali yaakatikkiriwa, Walusansa yalina ebiruubirirwa bingi era ng'amaliridde okuyitimuka mu bulamu. Yafuna digguli mu mbeera z'abantu era eky'omukisa nga wayise emyezi mibale, yafuna omulimu gw'ekirooto kye ogw'okukwatagananya ensonga z'abakozi mu kitongole ekirunqjamya abakozi mu ggwanga. Yafunanga omusaala mulungi ddala era ng'omuvubuka embulakalevu atannawasa era amanyi ky'ayagala, yettanira nnyo okutereka okusinga ensimbi okusaasaanya. Yayagala nnyo omulimu gwe era ng'aguwa obudde. Buli lunaku ye yasookanga okutuuka ku mulimu era nga y'asembanga okuvaawo. Kino kyamuleetera okuganja ewa mukama we era oluvannyuma lw'omwaka gumu, yakuzibwa n'afuuka omukwatagananya w'ensonga z'abakozi ow'okuntikko era n'omusaala gwe ne bagwongeza bw'atyo ne yeeyongera okukola obulungi.


Mu myaka etaano yali amaze okugula ettaka n'okwezimbira ennyumba ey'amaka. Waayita ebbanga ttono n'awasa omukazi w'ekirooto kye – Makula. Makula yali mukazi mulungi kaalaala era bombi ne batandika amaka gaabwe mu mukwano omuyitirivu. Makula naye yali yasoma nga yafuna ddiguli mu by'obulambuzi naye nga tannafuna mulimu. Walusansa teyalwa n'amuggulirawo edduuka eritunda engoye z'abakyala. Edduuka lyasikirizanga abaguzi bangi olwokuba lyali lijjudde engoye ate nga liri mu kifo kirungi. Omwaka ogusooka we gwaggweerako nga bamaze okugula emmotoka bbiri; emu ya Walusansa endala ya Makula.



Mu kiseera ekkyo, Walusansa yayagala bazaale omwana waabwe omubereberye mu bufumbo naye Makula n'agaana ng'awoza kimu nti talina kimupapya kufuna lubuto kwonoona bulungi bwe n'endabika ye kubanga yali akyayagala okulabika obulungi era ng'asikiriza.

Olwo nno yatandika okukozesanga ensimbi z'edduuka agule eby'okwewunda eby'ebbeeyi omuli ppawuda, engatto n'ebiteeteeyi. Yayiwaayiwa nnyo ensimbi okutuuka ku ssa ery'okwambala ekiteeteeyi ekipyia buli lunaku. Waalingawo n'engoye ze yayambalangamu omulundi ogumu gwokka n'azigabira mikwano gye n'enjanda. Tekyewuunyisa nti edduuka lyatandika okusereba, Walusansa ye ag'anyiikira kulyongeramu nsimbi naye era oluvannyuma lyagwa.

Ekintu ekkyo kyanyiiza nnyo Walusansa era ne kireetawo obutakkaanya wakati w'abafumbo banoo. Mukyla Nanfuka ssenga wa Vicoria bwe byamugwa mu kutu, yasitukiramoo ng'eyatega ogw'ekyayi. Teyalwa n'aleetera omuwala eddagala asobole okutaasa amaka. Eddagala erimu lyali lyakussa mu mmere ya Walusansa ne mu byokunywa bye ate eddala nga lya kussa wansi wa kitanda kyabwe.



Olwokuba Makula yali atya nnyo okufiirwa obufumbo bwe, yagoberera biragiro bya ssenga byonna.

Eddagala bwe yali yakatandika okulikozesa lyalabikanga ng'erinaakola kubanga bba yakkakkanamu okumala ennaku nga ziizo naye oluvannyuma ate yatabuka buto n'asinga ne bwe yali mu kusooka. Obutakkaanya ssaako eddogo mu maka byatabula nnyo Walusansa n'atandika okutuuka ku mulimu ekikeerezi ssaako n'okuvangayo nga bukyali. Kyaddaaki yaweebwa ebbaluwa emulabula. Makula bwe yabitegeera, yayita ssenga we abasalire ku magezi. Mu kiseera ekkyo ssenga yabawa ga buwa kugenda ku muganga. Olunaku lwe baasooka okukyala ew'omusawo, yabasaba buwanana bwa nsimbi ze baali batalina ekkyo ne kibaleetera okutunda emu ku mmotoka zaabwe okumusasula. Mu kiseera kye kimu Walusansa yatandika okufuna obulwadde bwa ppuleesa eyamukosa ennyo amaaso nga takyalaba bulungi. Akawungeezi akamu bwe yali ng'avuga emmotoka ava ku mulimu, yatomeregana n'emmotoka eyali esimbye ku mabbali g'ekkubo.



Eky'omukisa teyafa naye yo emmotoka emu yokka gye baali basigazza, yaggwaawo. Yamala ku kitanda ebbanga ddene nnyo era n'omulimu ne guggwaawo. Mukyala we yanyikiranga kugenda ku basawo b'ekinnansi nabo nga bongera kubasaba musimbi ekyabaviirako okutunda ennyumba yaabwe. Baawunzika bazze mu kupangisa buzigo bubiri mwe babeeranga ennaku n'ebakommontera omwo.



Ekyokukola 2. Okuwandiika

Kubiriza buli kinnoomu ku bayizi okuddamu ebibuuzo bino kusinziira ku kitundu ekyo waggulu;

1. Walusansa yafuna atya obugagga bwe?
2. a) Kiki ekyatuuka ku bugagga bwa Walusansa?
b) Ani yabukozesa obubi?
3. Biki by'oyiga mu lugero olwo waggulu?



Ekyokukola 3. Okwogera n'okuwuliriza

Abayizi bagabanye mu babinja bakole omulimu guno:

1. Bakubaganye ebirowoozo kungeri ey'enjawulo obugagga gye buyinza
 - a) Okukozesebwa obulungi.
 - b) Okukozesebwa obubi.
2. Omuyizi omu mu buli kibinja abuulireko ekibiina ebizuuliddwa.



Ekyokukola 2. Okuwandiika

1. Wandiika emboozi eri wakati w'ebigambo 300 ne 500 ku gumu ku mitwe gino wammanga:
 - (i) “Ssente temala byonna.” Kubaganya ebirowoozo
 - (ii) “Omululu gwa ssente y'ensibuko y'obubi bwonna”
 - (iii) “Omuntu omugagga ffugge teyeetaaga bantu” Kubaganya ebirowoozo.
 - (iv) “Bw'obeera ne ssente byonna obisobola” Kubaganya ebirowoozo .

4.5: Litulica Omwogere

Waliwo engeri nnyingi gye tuyinza okukozesa okwogera ku bugagga n'obwavu so nga ne bajajjaffe bali balungi nnyo mu nsonga eno. Bajajja baakozesanga enjogera ey'amagezi naddala engero ensonge, okugeraageranya wamu n'ebisoko. Emirundi mingi baayiyanga ennyimba n'ebitontome ebikwata ku bugagga ne ku bwavu.

- Omuganda agamba nti “Omuko omwavu akanya kugulu”. Amakulu nti omusaja omwavu bw'awasa mu maka amagagga ng'olwo anaafa mirimu anti gwe batuma guno na guli naddala nga ku buko ng'ebaddeyo omukolo kuba teri amuwa kituibwa.
- Ennyonyi enkeeze y'erya olusirijanjanyi olusava

- Otulo tw'okumakya y'ensibuko y'obwavu
- Mwavu ng'emmese y'omu kkanisa n'endala nnyingi .



Ekyukukola 1. Okusoma

Soma ekitundu kino wammanga:

Nalukwago omukyala omukozi w'emirimu

Nalukwago yali mukazi ɳjwaŋjuli eyali akola buli kalimu akamusala mu maaso kyokka nga talina ky'alinamu bumanyirivu. Olw'okwagala okufuna ensimbi, yagezaako bizinensi eziwera omwali okwokya amanda, okwokya enkoko, okukukola mu ssaaluuni, okutunda enva endiirwa, obummonde obuzungu, obuugi, n'emirala mingi.

Yakizuula luvannyuma nti abikka ebibiri tabojja anti ng'olwo talina kinene ky'afuna olw'okuba yali talina mulimu gumu kw'assa amaanyi ge. Kya ddaaki yasalawo okwemalira ku kutunda obuugi.

Olwokuba ennyonyi enkeeze y'erya olusiriŋjanyi, Nalukwago naye yazuukukanga tebunnalaba n'atandika okutunda obuugi okutuuka ku ssaawa bbiri ez'enkyo. Yali mukyala musanyufu nga gy'oli myoki wa gonja, kyokka ng'amanyi etteeka ekkulu mu mirimu ery'obutagattika bizinensi na mukwano.

Abantu bangi beegomba obwangu bwe yalina mu mirimu era nga takolaganira ddala na basoonooka nga kkova. Gye buvuddeko, Nalukwago yali akolerera kulya era nga yeeyaguza luggyo ate nga mukodo ekisusse. Jjajaawe yali yamulabula nti obwavu mpologoma.

Bino byonna bwe yabirowoozangako, amaaso n'agassa ku bigendererwa bye era ne yeewaayo okukola ekisoboka kyonna okusanyusa abaguzi be.

Olumu abaguzi baamusaba abaleetere ebinyeebwa ebisiike eby'okunywera ku buugi olwo ekkyo ne kimuzibula amaaso n'atandika okubisiikanga buli lunaku ate nga bw'abiwoomya nnyini. Teyaddirira mu nkola ye okutuuka lwe yafuna ejjamba anti ogutateganya.



Ekyokukola 2. Okuwandiika

Abayizi nga bali mu bibinja banokoleyo era bannyonnyole:

1. Engero n'ebisoko ebigendera ku bugagga n'obwavu
2. Okujjako ebyo ebikozeseddwa mu mboozi eyo waggulu, muwandiike enjogera ey'amakulu amakusike ekwatagana ku bugagga ne ku bwavu.

Ennyimba

Oluylimba ky'ekitundu ekirimu obubaka bw'osobola okussa mu ddoboozi esseenekekerevu n'oluyimba. Tegeeza abayizi nti ngy'ggyeeko okusanyusa abawuliriza, ennyimba zibeeramu obubakak obw'amakulu obuyigiriza abantu ku nsonga ezikwata ku bulamu.

Essira lisse ku nnyimba ezikwata ku bugagga oba ku bwavu.

Ennyimba zino zikunjaanyize ku ssimu yo nga weetegekera okuzissaako abayizi baziwulirize.



Ekyokukola 3. Okuwuliriza n'okwogera

1. Nga weeyamba essimu yo ey'omungalo, teekako oluyimba olukwata ku bugagga oba obwavu
2. Londa abayizi kinnoomu babuulire ekibiina obubaka bwe bafunye mu luyimba lw bawulidde ku ssimu.



Ekyokukola 4. Okuwuliriza n'okwogera

Mu bibinja abayizi bawe omulimu guno;

1. Mugeegeenye oluyimba lwonna lwe mumanyi oba lwe mwali muwliddeko olukwataganya n'obugagga oba n'obwavu
2. Ng'ovudde ku luyimba lwe muwlidde, muyimbe yo oluyimba olulala lumu lwe mumanyi oba lwe mwali muwliddeko olukwata ku bugagga
3. Ng'ojeeko oluyimba lwe muwlidde waggulu, muyiiyeoyo oluyimba olukwata ku bugagga oba obwavu era muluyimbe.

Ebitontome

Ebitontome y'emboozzi ewandiikibwa mu ngerimu y'obubaka obw'amakulu nga buli mu bigambo ebigesengekeddwa obulungi oluusi si lwa makulu gaabyo naye oluusi n'amaloboozi gaabyo n'eggono. Ebigambo biwandiikibwa mu nnyiriri oluusi nga biddirijjanwa ate nga mulimu entunnunsi oluusi nga bifaanaganya enjatula.

Abayizi basikirize ng'obabuulira obulungi bw'ebitontome. Bayambe okumanya nti ffenna twagala okuwuliriza ebitontome kubanga bitukwasa omubabiro ate nga mulimu obubaka obw'amakulu.

Leka baddiremu wamu ekitontome kino wammanga:

*Ssente ye muyambi era bannange waamukwano
Gwe nneetaaga mu biseera ebya kazigizigi
Bannange yafuuka mukwano owa nnamaddala!
Yiyyi! Owa! Bannange njagala ssente!*

*Ssente muganda wange anambereerangawo
Yadde ng'abalala bona banneesittaddeko.
Ssente ekyusa obulamu baana ba kitange,*

*Ekuambuza makkya gy'oba oli ku sseppulingi
N'owenyuka obuwewo, n'otambula ng'ozimba.
Yiiyi! Owa! Bannange njagala ssente.*

*Ssente ddagala mu budde bambi obw'obulwadde
Ereeta n'okuwona gy'oba onywedde ddagala!
Ddala ddala ssente w'ekuba egonzaawo
Anti ssente w'eba bassebo ow'enkata tazinga!
Yiiyi! Owa! Bannange njagala ssente!*



Ekyukukola 5. Okwogera n'okuwuliriza

Abayizi nga bali mu bibinja bya bana bana bayiye era batontome ekitontome ekikwata ku bugagga oba ku bwavu.

Ekyukukola ekiwumbawumba essuula

Essomero lyo liteekateeka empaka z'omwaka ez'okuyimba, amazina ne katemba nga ez'ennyumba ez'enjawulo. Empaka zino zeesigamiziddwa ku mulamwa, "Okumalawo obwavu mu Uganda". Abazadde n'abantu b'omu kitundu bajja kuberawo. Ennyumba yo esabiddwa okuyiayaayo ekitontome..

Ebiragiro

1. Yiiya ekitontome ekiri ku mulamwa "Okumalawo obwavu mu Uganda"
2. Tontoma ekitontome ekyo waggulu

Bye weetaaaga

- Noonyereza ku ngeri abantu b'omu kitundu kyo gye balwanyisaamu obwavu. Oyinza okukozesa empapula z'amawulire oba ebitabo ebikwata ku byenfuna.
- Teekaamu empenda ezitemeddwa wamu n'enkola ennambulukufu gavumenti gy'etaddewo okulwanyisa obwavu.

Engabanya y'obubonero

Ebisuubirwa	Okunnyonyola	Omutendera ogusooka	Omutendera ogw'okubiri	Omutendera ogw'okusatu
Obuyiya	Ayiiya ekitontome ekikye ku bubwe ekikwata ku bugagga oba ku bwavu	Ayiiya ekitontome ekikye ku bubwe (obubonero 2)	Ayiiya ekitontome ekikye ku bubweekikwata ku bugagga oba ku bwavu (Obubonero 3)	Ayiiya ekitontome ekikye ku bubweekikwata ku bugagga oba ku bwavu kyokka n'alaga ekisinga obulungi n'obubi (Obubonero 5)
Engeri gy'ayogeramu	Ayatula ebigambo nga toyeemotyamota	Aija ku ssitoegi, yeeyanjula, alamusa abasazi n'abawuliriza (Akabonero 1)	Akozesa bulungi ssitoegi, yeeyanjula, alamusa abasazi n'abawuliriza n'atontoma (Obubonero 2)	Aija kussitoegi n'obumalirivu nga toyeemotya, yeeyanjula, alamusa abasazi n'abawuliriza n'atontoma (Obubonero 3)
Ensa mu byogerebwa	Alina obumanyi ku nsonga z'ayogerake	Annyonyola ensonga ez'essimba bbiri mu kitontome (obubonero 2)	Annyonyola ensonga ez'essimba ssatu mu kitontome	Annyonyola ensonga ez'essimba nnya mu kitontome (obubonero 4)
Enjogera	Akozesa eddoboozi ory'omwanguka, nga taliimu kiwuggwe	Akozesa eddoboozi erikkakkamu ate eriwulikika (Obubonero 2)	Akozesa eddoboozi ory'omwanguka nga taliimu kiwuggwe (obubonero 3)	Akozesa eddoboozi ory'omwanguka Akakyusa eddoboozi okusinziira ku ky'ayogera (obubonero 5)



Ebisuubirwa	Okunnyonnyola	Omutendera egusooka	Omutendera ogw'okubiri	Omutendera ogw'okusatu
Enkozesa y'olulimi	Ayolesa obukugu mu nkozesza y'olulimi mu butuufu bwalwe	Annyonnyola ensonga bbiri ng'akozesa ebigambo oby'enkizo ebiri ku mulamwa (akabonero 1)	Annyonnyola ensonga ssatu ng'akozesa ebigambo oby'enkizo ebikwatagana n'omulamwa (obubonero 2)	Annyonnyola ensonga nnya ng'akozesa ebigambo oby'enkizo n'obisoko ebikwatagana n'omulamwa (obubonero 3)
Omugatte gw'obubonero				20



Essuula 5: Okutegeera obutondebwensi

12 Ensoma

Oluvannyuma Iw'essuula eno, omuyiziasuubirwa okuba ng'asobola;

Ebigambo ebikulu

- Obutondebwensi
- Ekirango
- Nakalazi / ssenfo
- Ebitontome
- Ppuloozi
- Okutaasa
- Ebitontome

- Okumenya ebintu ebyobutonde ebikola obutondebwensi.
- Okunnyonnyola ensonga ezivaako okwonooneka kw'obutondebwensi.
- Okumanya ekiyinza okukolebwa okutaasa obutondebwensi okwonooneka.
- Okubaga n'okuwandiika ekirango
- Okukozesa Nakalazi / ssenfo mu sentensi.
- Okuyiiya ebitontome n'okuwandiika ppuloozi ku butondebwensi.
- Okunnyonnyola olulimi olweyambisibwa nga twogera ku butondebwensi.
- Okukozesa omutimbagano okufunayo ebifaananyi ebiraga / ebinnyonnyola embeera y'obudde.

Essuula mu bufunze

Ekigendererwa ky'essuula eno kwe kuyamba omuyizi okutegeera olulimi olweyambisibwa nga twogera ku butondebwensi, okuyita mu ssuula eno era oija kuyiga ku bintu ebimu ebivaako okwonooneka kw'obutondebwensi naye n'ekisinga obukulu oija kumanya ekiyinza okukolebwa okutaasa obutondebwensi mu kitundu gy'obeera.

Ensomesa / Enkola y'okusomesa

- Abayizi bandisomedde mu mbeera ng'obutondebwensi babulabako, n'engeri gye bw'onooneeseemu.
- Abayizi baweebwe omwagaanya beenyigire mu bye basoma, nga beerowooleza, n'okulabako we kyetaagisizza.
- Balunjamye ku bintu bye baba basoose obusoosi okuwulira n'okulabako basobole okubitegeera.

Ebinaakuyamba

Kijja kukwetaagisa okukola okunoonyereza ku butondebwensi nga weeyambisa omutimbagano, osbole okumanya olulimi olweyambisibwa nga twogera ku butondebwensi. Fuba okulaba ng'ebigambo okozesa bya Luganda.

5.1: Ebintu eby'obutonde ebikola obutondebwensi

Weeyambise ekitundu kino wammanga olunjamye abayizi ku bintu ebikola obutondebwensi ebikooneeddwako, n'ebitakooneeddwako.



Ekyokukola 1. Okusoma

Abayizi basome ekitundu kino wammanga:

Obutondebwensi


Olunaku lw'eggulo nasazeewo ntambuletambuleko akawungeezi, ekyamazima nabadde ɳjenda wa munywanyi wange bwe twazirunda Kawooya. Nasanyuse kuba yannyanirizza bulungi era obugenyi nalidde obuwera, naye ekyasinze okunsanyusa ye ngeri gye yateekateeka oluggya lwe.

Mu luggya lwa munywanyi wange ono yasimbamu emit i egitakoma kumuwa bisikiriza mu biseera ng'akasana keememula, naye givaako n'empewo ennungi ey'obulamu.

Emiti gino girina ekintu ekirala ekyannewuunyisizza era nga nnali sikifangako, gikunjaanya ebinyonyi ebyabuli kika nga n'ebimu tebisangikasangika ne bizimba ebisu byabyo okwetooloola awakaawe wonna era bw'otuuka wali owulira amaloboozi g'ebinyonyi ag'abuli ngeri ate nga gonna ganyuma okuwuliriza.

Munywanyi yanjambye ekirala ekikulu ku miti egyo egibeera mu luggya, ate nga nakyo era mbadde sikimanyi, nti emit i egyo gimuyamba nnyo singa enkuba etonnya nga mbi. Nti kibuyaga mu kifo ky'okutuukira ku nnyumba ye agitikkuleko akasolya, akoma ku miti egyo egiri mu luggya.

Twanyumiza nnyo ne mmubuuza ebirungi ebirala mu kusimba emit i n'ategeeza nti emit i ng'ego gye nnalabye mu luggya lwe singa gisimbibwa mu bungi, okugeza buli muntu mu ggwanga n'asimba emit i egiwera, nti munnange giyamba okuvaako enkuba okutonnya eggwanga ne liwona okugwira ekyeya! Kale olabye!



Munywanyi Kawooya yayongedde n'antegeeza ate enkuba eva mu miti ng'egyo bwetonnya teba mbi ate ebeera nnyingi, nti kati ate olwo emigga n'ennyanja nabyo biba bifuna amazzi agawera nabyo ne byongera ku kolebwa kw'enkuba.



Enkuba bwe yeeyongera ettaka kwe tulimira nalyo libeera ggimu ebbanga lyonna, olwo nga n'okukozesa ebirimusa ebitali byabutonde kukendeera, abalimi nga balima ebirime ebitaliimu butwa obuva mu kukozesa ebirimusa ebikolerere n'okufuuyira buli kadde. Kale nayize ebintu bingi era nagenze okuva ewa munywanyi wange nga nkitegedde nti obutondebwensi kye kitegeeza.



Ekyokukola 2. Okuwandiika

Luŋjamya abayizi nga baddamu ebibuuzo bino okusinziira ku kitundu:

1. Okusinziira ku kitundu olowooza ekigambo butondebwansi kitegeeza ki?
2. Nokolayo ebintu eby'obutonde ebikola obutondebwensi nga bwe byogeddwako mu kitundu.
3. Kyusa ekitundu kino wammange okizze mu Luganda.

The National Environmental Management Authority (NEMA) is the principal agency responsible for the management of the environment in Uganda and it coordinates, monitors and supervises all the activities in this field. It aims at being an efficient and self-sustaining agency, ensuring that people in Uganda live in a clean, healthy, productive and sustainable environment.

While NEMA is responsible for the monitoring, planning and coordination of environmental matters, implementation is the responsibility of the relevant line ministries. There are environment liaison units within each of the line ministries responsible for integrating environmental concerns into their sectoral plans, and implementing environmental activities within the mandate of the ministry

5.2: Ebivaako okwonooneka kw'obutonde bwensi



Ekyokukola 1. Okusoma

Abayizi basome ekitundu kino wammanga:

Obutamanya kibi nnyo:

Ebitundu by'e Kumi mu buvanjuba bwa Uganda byamanyibwa nnyo olw'okulima lumonde omunene ate awooma. Okumanya ab'eKumi baalima lumonde, n'ebitundu ebirala nga Jinja, Mukono ne wano waffe e Wakiso ekiseera kyatuuka nga lumonde atundibwayo ava Kumi.


Naye ebiseera abiyiseeko emabega awo Kumi yalumbibwa ekyeya ekitaategeerekeka gye kyava era gye byaggwera ng'sbalunzi bafiiriddwa ensolo zaabwe olw'okubulwa amazzi n'omuddo. Abantu abamu ab'endowooza entono baatandika okubityebeka mbu embeera eyo yali evudde ku ddogo.Waliwo n'ebbiina by'agavubuka abakkakkana ku nnamukadde omu nga limulumiriza mbu y'aloga enkuba obutatonnya mu kitundu kyabwe.

Singa teyali ssentebe w'ekyalo kutaama namukadde ono agavubuka gaali geesomye okumumiza omusu.Eyo nno yali efuuse nkola ku byalo bingi mu Kumi, ng'abavubuka balumbagana buli mukadde abeera ku kyalo buli Iwewaagwangawo enjega eyeekuusa ku nkyukakyuka mu butondebwensi.

Naye ekyamazima kiri nti bw'otuuka mu bitundu by'e Kumi ebisinga obungi obutondebwensi bwataataaganyizibwa nnyo olw'abantu batema emitia okwokya Amanda. Mu butuufu otunula otunula n'onyeenya n'omutwe. Loole ezajjanga okutikka lumonde okumutwala mu bitundu ebirala, kati osanga zitisse ndoddo z'amiti n'ansawo z'amanda.



Ekirala ekivuddeko embeteza be bantu abagenda bookya empiira nga bayingga, n'abalala mbu eyo ye nkola gye bakozesa okusambula we baagala okulima. Ebitundu ebyali bijjudde kiragala omwerere nga n'okulengera emital kizibu, kati buli w'oyimirira osobola okuleangera ebifa emitala kubanga tewakyali yadde ensiko eyinza okukutayira.



Ekyewuunyisa nti n'ebisenyi n'entobazi ebyali biri mwamu amayuuni kati bisimwamu musenyu nga bagutwala mu bubuga obulanaaye Kumi. Kati omuntu ne yeefuuza nti abantu bagenda kulya ki yadde nga ssente bazifunye okuva mu ebyo byonna byebakola ne bivaako okwononeka kw'obutondebwensi?



abantu abatono abasigazzaawo ku ttaka ettono kwe balimira nalyo terikyaddako mmere kuba balikozesezza nnyo ne liggwamu obugimu bwonna. Ebikolwa eby'engeri eyo bye bivuddeko embeera y'obudde okukyuka e Kumi kubanda obutondebwensi butaataaganyiziddwa nnyo, ate bwe wataabeewo kikolebwa embeera ey'engeri eyo ejja kutuuka ne mu bitundu ebirala.





Ekyokukola 2. Okuwandiika

1. Abayizi banyonnyole ebintu ebivaako okwonooneka kw'obutondebwensi okusinziira ku kitundu.
2. Abayizi bawandiikayo ensonga endala ze balowooza ezivaako okwonooneka kw'obutondebwensi nga tebyogeddwako mu kitundu ky'osomye



Ekyokukola 3. Okwogera n'okuwuliriza

1. Abayizi banyonnyole ebintu ebivaako okwonooneka kw'obutondebwensi okusinziira ku kitundu.
2. Abayizi bawandiikayo ensonga endala ze balowooza ezivaako okwonooneka kw'obutondebwensi nga tebyogeddwako mu kitundu ky'osomye

3.5.3: Ekiyinza okukolebwa okutaasa obutondebwensi okwonooneka



Ekyokukola 1. Okwogera n'okuwuliriza

Abayizi basome emboozi nga Musoke ne Kibuule boogeeraganya, n'olvannyuma bagizannyemu akazannyo.

Musoke: Eh, wasuze otye Kibuule? Okedde wa ku makya gano ng'owambagatanye n'embazzi ko n'emisumeeni?

Kibuule: Nasuze bulungi Mw. Musoke. Munnange anti ow'ebisale by'abaana by'essomero lubadde. Tomanyi nti omwezi ogujja baddayo okusoma? Kati nzikirira mu kibira ntemeyo ku miti nga giigyo, njokyeyo ku manda mwe naggya ku kasente.

Musoke: Kasente ki Kibuule? Ddala ddala tolina ng'eri ndala gy'oyinza kufunamu ssente okusinga okutema emit? Ah ah, kati bukya otandika kutema miti waakasimbayo emeka ssebo?

- Kibuule:** Kyokka Mw. Musoke naawe! Ekibira kiri ekijjudde emiti kati oyagala emiti nsimbe gyaki? N'egirimu gitulemye okumalamu nti ate tusimba mirala? Tulekeeko naawe!
- Musoke:** Oooh! Kati sebo bw'oba ogitema tozzaawo bazzukulu bo osuubira balisanga ki? Weeyise ng'omuntu alowooza mwattu
- Kibuule:** Mw. Musoke onnyonoonera biseera kyendabye, kuba ebbanga lye mmaze wano singa nina emiti gye ntemyewo egiwera. Ndowooza by'oyogera biweddeyo emboozи tugikomye awo?
- Musoke:** Nedda ssebo, ekyo ky'okola ky'onoona butondebwansi. Buli lw'otema omuti n'otozzaawo mulala, ekiseera kijja kutuuka ng'enkuba tekyatonnue. Ate many anti n'ebintu by'obutonde ebirala ng'ebinyonyi n'enkima tebikyalina we bibeera.
- Kibuule:** Kati laba nno ono! Ebinyonyi n'enkima binkwatirako wa? Binampa ssente eziweerera abaana bange?
- Musoke:** We bituuse njenda kukunga abantu bonna ku kyalu kuno tulabe nti ebintu byonna by'okolera mu kibira biyimirizibwa, kubanga bijja kutuviiram mu obulabe ffenna.
- Kibuule:** Ssebo, ogambye otya? Simanyi mpulidde bubi? Weerabidde nti ekibira kye mwagala okungobako kibira kyange bwoya? Ssebo, ettaka eryo lyonna okuli n'ekibira nalisikira kuva ku kitange.
- Musoke:** Tewali awakana ku kyakusikira ttaka lya kitaawo, naye osaanye omanye nti enjega eneева mu bintu by'okolera ku ttaka eryo tejja kukosa ggwe wekka, wabula ffenna bannaalumanya ne ssaalumanya. Ate mu ngeri y'emu singa okola ebigasa era ffenna tuba tuganyulwa. N'olwekyo weekube mu kifuba komya okulimira mu lutobazi, yadde ng'omuceere gutuwoomera gw'obadde olimirayo.

Ate n'eri ku lukalu gy'olimira, laba ti tolimira ku ttaka lyerimu kumala bbanga ggwanvu, obugimu buliggwaamu.Bw'onookyusaamu tojja kwejjusa.

Kibuule: Awo nno olina ensonga Mw. Musoke; kati olinayo ku ndokwa z'emiti ntware nsimbeyo? Ekyamazima by'njambye birimu eggumba.

Musoke: Kankebere ndabe oba nasigazaawo ku ndokwa aba NAADS ze baatuwaako jjuuzi.



Ekyokukola 2. Okuwandiika

1. Nga bakola bana bana bawandiike ebintu ebiyinza okukolebwa okutaasa obutondebwensi ebyogeddwako mu mboozи eyo waggulu.
2. Baleeteeyo ebintu ebirala ebiyinza okukolebwa okumalawo okwonooneka kw'obutondebwensi.



Ekyokukola 3. Okwogera n'okuwuliriza

Abayizi basome okwogera kuno wammange, n'oluvannyuma kuzannyibwemu akazannyo:

Ssebo omukulu w'essomero, mumyuka wo, omukulu w'ebymesoma, abasomesa, abakulembeze b'abayizi, abayizi, bassebo ne bannyabo, mbalamusiizza buli omu mu kit kye.

Amannya nze Kyeyune Mwambala era nga nze mukulembeze w'abayizi avunaanyizibwa ku by'obulamu mu ssomero lino. Ensonga ennyimirizza mu maaso gammwe leero kwe kubasomesa ku ngeri gye tuyinza okwewala okumansamansa kasasiro mu ssomero. Basomesa, wamu ne bayizi bannange, mukkirize oba mugaane naye embeera mbi.

Ssebo omukulu w'essomero nzikiriza nkuloopere bayizi bannaffe abasula mu kisulo ekiri okumpi n'omwala be bayizi abasoma ssiniya eyookubiri. Ssebo abayizi bo bano kye bakola buli kasasiro yenna ava mu kisulo kyabwe baasalawo kumuyiwanga mu mwala ogwo ogubaliraanye.

Bwotuuka ku mwala guli weewuunya bannange.

Gujjudde obucupa bw'amazzi, obuveera, obucupa bwa soda, ekyewuunyisa ate nga kikwasa n'ennaku, n'abawala ebiwero bye bamaze okukozesa nga bali mu nsonga zaabwe nabyo babisuula omwo!

Kati omwala guzibikide, era enkuba ennyingi eyatonnya jjuuzi yagenda okukya ng'amazzi ganjadde wonna okulinaana ekisulo ekyo. N'olwekyobannange enkola eyo esaana kukomezebwba mbagirawo. Kasasiro yenna mu ssomero alina ekifo w'akuŋjaanyizibwa era tumanyiwo, tumutwalenga eyo.

Ekirala ssebo omukulu w'essomero, bayizi bannaffe abamu tebamanyi kukozesa kaabuyonjo. Otuuka mu kaabuyonjo n'ekusobera, oluusi n'ekyakututtteyo ne kikuggwaako anti nga ne w'olinnya tolabawo. Ekivudde mu ekyo be bayizi abatasobola kukozesa baabuyonjo ez'engeri eyo, okutandika okweyambira mu buveera, bwe bamala ne babukasuka mu nsiko, era kati ensiko etwetoolodde yonna ejjudde empitambi Mbasaba bannange tufube tuyonje kaabuyonjo zaffe, ate ze tuba tukozesa okweyamba tuva mu kukozesa obuveera.

Ol'wbudde bassebo ne bannyabo nsaba munzikirize nkome awo, newankubadde ebyowogerako mbadde nkyalina. Mbaagaliza olunaku olulungi, Mukama Katonda abakuume.

Ssabasajja Kabaka awangaale.

5.4: Okuwandiika ekirango



Ekyokukola 1. Okusoma

Ekigendererwa ky'ekyokukola kino kiyamba bayizi balabe ebantu ebikulu ebitabula mu kirango.

Abayizi beekenneenyekirango kino wammanga:

Ekirango eriabantu bona

Omukulu atwala eby'obutondebwensi ku diisitulikiti y'e Mpigi ng'akolaganira wamu n'ekitongole ekivunaanyizibwa ku butondebwensi mu ggwanga (National Environmental Management Authority- NEMA) ateggeza abatuuze b'e Mpami n'ebyalo ebirinaanyeewo nti mujja kuba n'olukiiko n'abakulu okuva ku diisitulikiti n'abekitongole kya NEMA ku kitebe ky'essaza Mawokota e Butoolo.

Olukiiko lwa kutuula mu mwezi gwa Ntenuv u ng'ennaku z'omwezi nya omwaka 2020, ku ssaawa 4:00 ez'enkyo. Omulamwa gw'olukiiko kwe kulaba engeri obutondebwensi gye buyinza okutaasibwamu. Bassentebe b'ebyalo mukubirizibwa okukunga abantu bajje mu lukiiko luno..

Birangiddwa,
Namulindwa Pawulina
Atwala eby'obutondebwensi ku diisitulikiti e Mpigi



Ekyokukola 2. Okuwandiika

1. Abayizi balunjamye bawandiike ebintu ebikulu ebitalina kubula mu kirango nga beesigama ku kirango kye basomye.

Ebimu ku bitabula mu kirango mulimu:

- Omutwe
- Ennaku z'omwezi
- Alanga
- Ategeezebwa
- Ekirangibwa
- Ekirina okukolebwa ku kirangibwa
- Endagiriro y'alanga
- Endagiriro y'ategeezebwa

2. Nga bakola babiri babiri, abayizi babage era bawandiike ekirango ekinalabikira mu lumu ku mpapula z'amawulire nga bayita abantu mu lukiiko okubabuulira ku kabi akali mu kwonoona obutondebwensi.



Ekyokukola 3. Okwogera na kuwuliriza

Ekirango kye bawandiise mu ky'okukola 02 waggulu buli bamu bakisomere bannaabwe nga bwe bawuliriza, n'oluvannyuma bakubaganye ebirowoozo ku kirango ekisinze okuggyayo obulungi obubaka.

5.5: Nakalazi / Ssenfo

Abayizi babuulire Iwaki obugambo, ku mu e ne wa buyitibwa Nakalazi, era obaluunjamye ku nkozesha y'obugambo buno naddala okukkaatiriza nti tubwawula nga tuwandiika.

Mu Luganda obugambo obwo bwe tuba tubukoza mu sentensi tubwawula ku bigambo ebirala ne buba nga bwetengeredde. Okugeza;

- Teeka essowaani ezo ku mmeeza.
- Njagala kugendako mu ddwaliro.
- Mwasoma ku butondebwensi nga muli mu siniya esooka?
- Bw'otuuka e Kampala ombuulira.
- Kasiye yekwese wansi wa kitanda.

Obugambo obwo buyitibwa nakalazi oba ssenfo Iwansonga nti butulaga ekifo ekiba ky'ogerwako mu sentensi



Ekyokukola 1. Okusoma

Abayizi basome ekitundu kino wammanga, n'oluvannyuma baddemu ebibuuzo ku kyo;

Nga nnya omwezi gwa Gatonnya mu mwaka gwa 2020, enkuba bikokyo yatonnya e Kyaddondo ne mu bitundu ebirala ebirinaanyewo emyala mu Kampala ne gjijula ne gibooga olw'amazzi okubulwa ekkubo erigatwalamu ntobazi ne mu migga.

Emyala egyandibadde gitambuza amazzi e Kampala abantu baagijjuza kasasiro owa buli kika, omuli obuveera, obucupa bw'amazzi n'obwasooda, n'olwekyo enkuba bwetonnya amazzi gaba tegalina we galaga n'ekivaamu mataba.

Mu biseera by'enkuba enguudo mu bitundu nga Namasuba, Zzana, Kyambogo n'ewalala ziba teziyitikamu. Ekitongole kya Kampala capital city authority (KCCA) kyali kisuubizza okumalawo embeera eno mu Ntenvu w'omwaka 2019 naye kirabika nakyo embeera yakiremerera.

abantu embeera eno b'esinga okukosa bwe bakunyumiza bye bayitamu tolema kubasaasira.

Bangi ku bantu bano bagamba nti enkuba bwetonnya emitima gibaba ku mitwe ng'eyabuulira o'wolugambo, anti ebintu mu mayumba gaabwe biba bigenda kwonooneka. Waliwo eyanjamba nti yalina ebitabo bye nga yabissa wansi wa kitanda naye amataba bwe gajja teyasigaza yadde ekimu.



Ekyokukola 2. Okwogera n'okuwuliriza

Nga bakolera mu bibinja, abayizi bakubaganye ebirowoozo ku kiyinza okukolebwa okutereeza embeera ebeera mu Kampala ng'enkuba etonnye.



Ekyokukola 3. Okusoma n'okuwandiika

Abayizi bajjuzeemu nakalazi / ssenfo ezituukira mu mabanga agalekeddwa mu sentensi zino wammanga:

- Baana mmwe mulekere awo okusuulasuula kasasiro Luggyga.
- Abantu abalambuddeko Buddu beewuunya engeri abaayo gye bakuumye obutondebwensi.
- Ffe wano tetutereka kintu kyonna wansi kitanda kuba essaawa yonna amazzi ganjaala ne gayingira mayumba gaffe.
- Bw'oba olimira Ntobazi okola bubi nnyo kuba obutondebwensi obwonoona.
- Waggulu buli mumanyi eriyo ate omumanyi asinga.

5.6: Ebitontome ne ppuloozi

Mu ssomo lino essira liteekeebwe ku kulaba ng'omuyizi asobola okusoma ppuloozi n'okumutegeera, wamu n'okusobola okumwawula ku bitontome.



Ekyokukola 1. Okusoma n'okuwandiika

Omuyizi omu asome ekitontome kino wammanga, ng'abalala bawuliriza

Oyo ye nnyaffe

*Nze atamanyi bukulu bwa maama mmwewuunya,
Atamanyi mugaso gwa maama ddala yeewuunyisa.
Maama ng'atufaako bannange,
N'atuliisa n'abikka,
N'atuyonja n'akuumma
N'atunoonyeza kye tunaalya
N'atutaasa ebyobulabe
Kyokka atamanyi bukulu bwa maama,*

*Ye amujolonga n'atamanya,
Nti maama oyo n'amala avaawo
Naye obulamu bwe bukyuka nnyo
N'ajulirira akomewo
Naye nga tekikyasoboka.*

*Olwo nno ne kifaananako,
N'oyo ajolonga obutondebwensi ye,
Ng'ayokya Amanda
N'okulima mu ntobazi,
Ssaako ottema emitı,
Ate n'atasimba mito*

*Waliwo ne bannaffe
Bo nga booki na mpiira
Oba baba banoonya ki?
Bwe bava awo ne beebeuuza,
Mbu "Oba bannange amataba
gatulumbira ki?
Obatunuulira ne weewuunya
Ndowooza yaabwe eyo
Gye tulaza!*

*Kaakati nze nno kye nteesa,
Komya ejjoogo
Gwe abadde yeewulinkiriza
Nnyaffe butondebwansi
Tumuwe ekitiibwa kye
Kitutaase okwejjusa olulala.*



Ekyukukola 2. Okuwandiika

Nga bakola babiri babiri baddeemu ebibuuzo bino:

- Omutontomi “Nnyaffe” gw’ayogerako mu kitontome y’ani?
- “Nnyaffe” oyo gw’oyogeddeko mu (a) waggulu, abantu bamujoooga batya?
- Munnyonnyole ku ngeri ejjoogo erikolebwa ku “Nnaffe” gye liyinza okukomezebwa.
- Ekitontome kyawukanye kitya ku biwandiiko ebirala bye muzze musomako



Ekyukukola 3. Okusoma

- Abayizi basome ekitundu kya ppuloozi kino wammanga, naye ekigendererwa ekikulu mu kyo balunjamyé ku bintu bino wammanga.
 - Omuntu ayogererwamu
 - Omulumwa/obubaka
 - Omwogezi mu kitundu n’engeri gy’awulikikamu
 - Embeera ekitundu gye kiteeka mu musomi
 - Ensengeka y’ebirowoozo
 - Enzimba y’ekitundu

Obukodyo obweyambisiddwa okutuusa obubaka eri abasomi. Wano batunuze mu bintu nga bino:

- Ekitundu okukiwa omutwe – gufunza obubaka, n’okubaguliza ku musomi

- Okwewayambisa ppalagulaafu ez'enjawulo – omusengekeddwa obubaka obutali bumu
- Obubonero bw'empandiika – butonze embeera mu kitundu
- Omuntu ayogererwamu – (wookubiri - ggwe) kiyambye okusembeza omuwandiisi kumpi n'omusomi,
- Ebibuuzo ebiteetaaga kyakuddamu – kiwa omusomi okwefumintiriza ku bubaka mu kitundu, n'ebirala

Enkyukakyuka gy'oyagala esookera ku ggwe:

Abantu bangi boogedde ku bizibu ebivaako obutondebwensi okwonooneka era ekyamazima bangi babimanyi bulungi. Otuuka mu kitundu obutondebwensi gye bw'onooneddwa abaaye ne batandika okukubuulira nga bwe boogeddeko n'omusaja gundi oba gundi akomye okulimira mu ntobazi naye n'agaan, ne bakubuulira bwe bakubirizza abavubuka okukomya okutema emitit nga bagyokyamu Amanda, nti naye bewulinkiriza n'embooz ezifaananako bwezityo nnyingi.

Kyokka ekibuuzo ne kisigalawo nti, abantu bwe baba nga bino byonna babimanyi, obutondebwensi ne buba nga bukyatyoboolwa?

Ekyokuddamu eri ekibuuzo ekyo, ggwe asoma bino ggwe okirina, era singa osalawo nti kye kiseera kiddibwemu, n'akataayi tekajja kusala ng'obutondebwensi bumaze okutaasibwa. Nkulaba kati otandise okunnewuunya engeri gye "nkusibako amatu g'embuzi nkuliise engo." Naye ekituufu kye kyo, ggwe olina ekyokuddamu ekisibye byonna, Iwaki? Tugende mpola.

Simanyi myaka gy'oina naye kankubuuze, bukya omanya bukulu bwa bulungibwansi, waakasimbayo emitit emeka?

Kale ekyo kinene, naye mirundi emeka gye bakusibidde ebintu mu kaveera ng'ogenze ku dduuka n'ogaana akaveera? Kale n'awo tolina kyakukola, ebintu by'oba oguze bingi era tolina w'akubitwalira, akaveera olina okukatwala eka, naye mirundi emeka gy'okunjanyiiza obuveera obuli ewammwe n'obwokya? Tewali nsonga Iwaki onenya abalala ng'olutalo olutono ennyo bwe lutylo lukulemye okulwana. Singa okola waakiri kimu ku bintu ebitonotono bwe bityo, obutondebwensi bujja kutaasibwa. Nze kye nvudde nkugamba nti ekyukakyuka gy'onoonya erina kutandikira ku ggwe.



Ekyokukola 4. Okuwandiika

Abayizi nga bamaze okusoma ekitundu, baddemu bino.

- Nnyonnyola obubaka omuwandiisi bw'atutusaako okuyita mu kitundu ekyo waggulu.
- Omuwandiisi lwaki ekitundu yakiwa omutwe ogwo?
- Bw'omaze okusoma ekitundu owulidde otya/kikutadde mu mbeera ki.

5.7: Olulimi olweyambisibwa nga twogera ku butondebwensi



Ekyokukola 1. Okuwandiika

Abayizi balunjamye bawandikeyo emboozi eyeefaananyiriza eyo gye basomyeko waggulu. Ekibuuzo kino wammanga kibayambe okubalunjamya.

Ng'okola ne munno muwandiike emboozi ya bigambo nga 250, mugyesigamye ku bigambo bino wammanga, mugiwe n'omutwe ogugituukirako.

- Entobazi
- Enkwata y'a kasasiro esaannidde
- Okukulugguka kw'ettaka
- Okutaasa obutonde bw'ensi
- Ebibira
- Emiti
- Obutondebwensi
- Okuzzaawo ebibira
- Amazzi
- Enkuba
- Okwokya amanda
- Obuveera



Ekyokukola 2. Okwogera n'okuwuliriza

Nga bakolera mu bibinja, abayizi bayiiyeeyo ekitontome nga kyogera ku bibi ebiva mu kwonoona obutondebwensi, n'oluvannyuma buli muyizi asmere banne ekitontome kyawandiise.



Ekyokukola ekiwumbawumba essuula

Wategekeddwawo empaka z'okuwandiika emboozi ku mutwe ogugamba nti,

“OKUKUUMA OBUTONDEBWENSI KULIMU EBIRUNGI NJOLO”

Wandiika emboozi ya bigambo 250-300 gy'onooweereza okwetaba mu mpaka .

Ebyokugoberera

- (i) Munoonyereze ku birungi ebiri mu kukuuma obutondebwensi
- (ii) Bye mufunye mu kunoonyereza kwammwe buli omu mubikubaganyeko ebirowoozo
- (iii) Mwejjukanye ku ngeri y'okuwandiika emboozi ennyuvu.

Ebinaabayamba

1. Ebitabo ebikwata ku butondebwensi
2. Abantu abamanyi ku bikwata ku butondebwensi
3. Omutimbagano n'empapula z'amawulire.

Ekyokukola ekiwumbawumba essuula

Engabanya y'obubonero

Ebigebererwa	Okunyyennyola	Enkola 1	Enkola 2	Enkola 3
Omuseno gw'omboozi empanvu	<ul style="list-style-type: none">• Ennyanjula wano alage obutondebwensi kye kitegeeza, awooyo ku by'okulabirake by'ebintu ebikela obutondebwensi.• Akozese ku bisoko, engero, ebigambo ebigagga, n'enjogera.• Okuwumbawumba	Omuyizi akoze kimu ku bisuubirwa, (Obubonero 4.5)	Omuyizi akoze 2 oba 4 ku bisuubirwa, (Obubonero 09)	Omuyizi amazeeyo byonna, (Obubonero 18)

Ebigobererwa	Okunyennyola	Enkola 1	Enkola 2	Enkola 3
Ekinusizi	<p>Omuyizi asuubirwa okuwa ensonga nga zino;</p> <ul style="list-style-type: none"> • Okufuna enkuba • Kikendeeza endwadde • Kikendeeza enjala • Kirabica bulungi ensi • Kitumbula ebyobulambuzi muggwanga 	<p>Omuyizi awaddeko bisatu n'okudda wansi, ebubonero (08)</p>	<p>Awadde wakati w'ensonga nnya n'omukaaga obubonero (14)</p>	<p>Abiwadde byonna oba n'okusingawo, ebubonero (22)</p>
Empandiika entongole	<p>Omuyizi asuubirwa okuwandika amaloboozi agawangaala n'okuggumira mu butuufu bwago, Okugoberera amateeka agafuga ennyukuta W ne Y, L ne R wamu ne Nakinyindwa</p>	<p>Omuyizi akoze ensobi munaana ku kkumi, ebubonero (02)</p>	<p>Omuyizi akoze ensobi mukaaga, ebubonero (04)</p>	<p>Omuyizi akoze ensobi nnya n'okudda wansi ebubonero (10)</p>
Omugatte gw'obubonero				(50)



Essuula 6: Amazzi

Ensoma 10

Oluvannyuma Iw'essuula eno, omuyizi asuubilwa okuba ng'osobola

Ebigambo by'enkizo

- Amazzi
- Amayonjo
- Ebyobutonde
- Emigaso
- Okusoma ekitundu
- Okufunza
- Okukyusa
- Endwadde
- Okutereka amazzi
- Ebitonde
- Nakongezalinnya
- Ebikolwa

- Okunokolayo ensibuko y'amazzi, amayonjo n'ago agatali.
- Okunnyonnyola emigaso gy'amazzi.
- Okunokolayo ebikolwa ebikozesebw mu kunnyonnyola emigaso gy'amazzi.
- Okusoma n'okutegeera ekitundu.
- Okutegeera n'okuddamu ebibuuzo ku kitundu ekikuweereddwa.
- Okusoma n'okutegeera ekitundu.
- Okutegeera n'okuddamu ebibuuzo ku kitundu ekikuweereddwa.
- Okutegeera emitendera gy'okufunza.
- Okufunza ekitundu.
- Okutegeera emitendera gy'okufunza.
- Okutegeera emitendera gy'okukyusa.
- Okukyusa ekitundu ekiwanvu.
- Okunokolayo eby'obutonde eby'omumazzi.
- Okutegeera Nakongezalinnya n'ebika byazo.
- Okukozesa Nakongezalinnya mu butuufu bwazo.
- Okukozesa omutimbagano, mu kukuba ebifaananyi eby'obutonde eby'omumazzi.

Essuula mu bufunze

Ekigendererwa ky'essuula eno kwe kuyamba omuyizi okutegeera byonna ebikwata ku mazzi gamba nga, okumanya ensibuko y'amazzi amalungi n'ago agatali malungi, endwadde eziva ku mazzi n'engeri gye tuyinza okuzeewalamu. Omuyizi ategere emitendera gy'okusoma n'okuddamu ebibuuzo, okufunza n'okukyusa.

Ensomesa / empenda z'okusomesa

Abayizi kyandibadde kirungi ne basomesebwa nga kye basoma bakirabako n'amaaso oba n'okukwatako we kyetaagisizza. Abayizi baweebwe omukisa okwezuulira n'okwenyigira mu bisomesebwa. Ate era oynza n'okukozesa enkola ey'okubuuza ebiibuuzo nga bwe baddamu.

Ebinaakuyamba

Weeyambise enkola ya Teknologiya, wamu n'omutimbagano okusobola okumanya ebikwatagana n'amazzi mu bulamu obwabulijjo.

6.1: Ensibuko y'amazzi amayonjo n'agatali mayonjo

Waliwo ebifo era n'engeri nnyingi ze tufunamu amazzi mu kitundu kyaffe. Amazzi gasobola okuba amayonjo oba amakyafu okusinziira ku kifo we gaba gavudde.

Luñjamya abayizi basome okwogeraganya kuno wammanga okulaga ensibuko y'amazzi amayonjo, n'ago agatali.



Ekyokukola 1. Okusoma

Abayizi basome emboozি eno eri wakati w'abantu ababiri nga boogereganya:

Maria: Nga nsanyuse okukulaba Nampeera, ye ogenda wa?

Nampeera: Nange bw'entyo. Nga bw'ondaba munnange, ḥenda kukima mazzi

Maria: Kukima mazzi, tekikkirizika nti ogenda kwetikka ekidomola kyamazzi, ye ogenda kugajja wa?

Nampeera: Amazzi gaffe tugajja ku nnayikondo naye nga waliwo akatemerero okuva awaka, naye olumu tukozesa amazzi ag'omudumu.

Maria: Ag'omudumu? Gano gaba mazzi ga nkuba agaterekebwa mu ttanka oba gava mu luzzi



Nampeera: Nedda. Gano gaba mazzi, agayita mu midumu ne gatuuka mu maka g'abantu nga gava mu kifo we bagalongoosereza okugafuula amayonjo. Ekitongole ky'amazzi ne kazambi kye kivunaanyizibwa ku mazzi gano.

Maria: Nga mwesiimye!

Nampeera: Twesiimye, lwaki oyogera bw'otyo? Mbadde mmanyi nti amazzi tugasena mu bifo bye bimu!

Maria: Nedda, wetujja amazzi wanjawulo nnyo okuva ku mmwe. Ffe amazzi tugakima ku luzzi

Nampeera: Oluzzi, lufaanana luty? Luzimbiddwa bulungi?

Maria: Nedda. Luli awo mu kyangaala okuliraana olutobazzi, abantu bakolerawo ebintu ebya buli ngeri. Boolezaawo engoye ne banaabirawo. Abalaalo baleetawo amagana gaabwe okunywa amazzi. Obw'olumu abaana bawugiramu n'okuzannya nga bwe bagezaako okukwata ensonzi



Nampeera: Ekyo nga kibi nnyo! Kati olwo musobola mutya okugayonja okugatuusa ku ssa ly'okubeera nga tegalina bulabe eri aganywa?

Maria: Abantu abasinga bamala gaganywerawo. Naye ffe awaka, maama atukuutira okusooka okugasengejja n'akagoye akayonjo nga tetunnagateeka mu nsuwa.

Nampeera: Ekyo tekimala Maria, lwaki temukoza empeke ezirongoosa n'okutta obuwuka bwonna obubeera mu mazzi?

Maria: Kanzireyo ewaka mbuulire maama kwebyo by'oñjambye. Weeraba.

Nampeera: Weeraba. Tunaalabagana olulala.



Ekyokukola 2. Okuwandiika

Abayizi balunjampye baddemu ebibuuzo bino wammanga ebikwata ku kwogeraganya okwo waggulu:

- Nokolayo ebifo omuva amazzi ebyogeddwako mu kwogeraganya.
- Nokolayo ebifo omuva amazzi ebitakooneddwako mu kwogeraganya.
- Laga ebifo mwe tuyinza okufuna amazzi amayonjo n'ebyo bye tusangamu amazzi amakyafu.

6.2: Emigaso gy'amazzi

Mu bintu ebikulu omuntu bye yeetaaga okutambuza obulamu bwe mwe muli amazzi. Era eno y'ensonga Iwaki waliwo n'enjogera egamba nti "amazzi bwe bulamu." Emu ku nsongha eri nti buli muttu yettaaga amazzi okusobola okutambuza obulamu. Amazzi gakozesebwa ebintu eby'enjawulo mu maka, mu by'obulimi, amakolero ne mukwewummuzaamu ng'okuwuga.



Ekyokukola 1. Okwogera n'okuwuliriza

1. Abayizi bakole babiri babiri, balage emigaso gy'amazzi eri
 - a) Amaka
 - b) Eby'obulimi
 - c) Amakolero



Ekyokukola 2. Okuwandiika

1. Abayizi bawandiike emboozi ey'okukubaganya ebirowoozo ya bigambo 250-300 ku mutwe ogugamba nti; "**Amazzi bwe bulamu**".

6.3: Okusoma ekitundu n'okukitegeera

Luñjamya abayizi ku nsongha ez'enjawulo Iwaki tusoma ebiwandiiko eby'enjawulo omuli; okusoma nga twewummuzaamu, oba nga tulagiddwa, n'oluusi nga twagala kutegeera obubaka obuli mu kiwandiiko.

Wabula, oba waliwo ensonga oba tewali etuwanliriza okusoma, abayizi balage nti twetaaga okutegeera bye tuba tusomye. Abayizi balunjampye kun kola z'okusoma zino wammanga;

1. Okussaayo omwoyo ku kye basoma
2. Okusooka okusomamu enkola y'ekikaabugo
3. Okwetegereza ennyanjula n'enfundikira y'ekiwandiiko
4. Ekiwandiiko okukiva okukiva okumu ng'osoma
5. Okwetegereza ebibuuzo ebibuuzeedwa
6. Amakulu g'ebigambo gaweebwa okusinziira ku kitundu mwe bikozeseddwa, so si ng'omuyizi bw'abitegeera



Ekyokukola 1. Okusoma


Abayizi basome ekitundu ekibaweeddwa n'oluvannyuma baddemu ebibuuzo ku nkomerero yaakyo;

Enkuuma y'amazzi ey'omulembe n'eyennono:

Bwe nnali nkyali muto, nabeeranga mu kibuga wamu ne Kitange era ne bakitange abalala abato babiri. Naye, obutabanguko obwatandikibwa ab'eggwanga lyaba Kalimajong nga bawamba ente zaabo abaali babeetoolodde we kwatuukira ku ntitko mu myaka gya 1980 abooluganda abawerako baatwegattako mu maka gaffe. Mwabo mwalmu jjajja mukyala ne senjange. Abagenyi abasinga baali tebabeerangako mu kibuga, era bewunya nnyo okulaba amazzi agayita mu midumu ne gatuuka mu kifo we twayolezanga ebintu, mu binaabiro ne mu kabuyonjo z'omunnyumba.

Nzijukira bulungi olunaku ssenjange lwe yawkata ekikopo nagenda mu kinabiiro n'asena amazzi okuva mu kabuyonjo ng'agiyita ensuwa! Yali agenda bwati okugakwasa omugenya Kitange n'agamujjako kuba ye yali amaze okulaba gye yali afubutuse okujja mu ddiro.

Ky'amazima yali aviiridde ku ludda lw'ekinaabiro era bwe yabuuzibwa gy'agajje yaddamu n'obuwombeefu bungi nti mu nsuwa eri mu kinaabiro! Yayongerako na bino nti, amazzi gabaddemu matono mu nsuwa kyavudde aleeta ekikopo eky'ekitundu nayeasuubira nti omugenya gajja kumumala ennyonta.




Kitange yatunula mbebere nga yenna awulira aswadde. Oluvannyuma yannyonyola mwannyina ensobi gye yali akoze.

Abantu bava mu kyallo bakola ebintu bingi eby'efaananyirizaako ng'ekyo, naye nga bambi babikola mu butamanya. Bannakibuga n'abo bwe bagenda mu kyallo waliwo ebintu bye bakola ebalitali bya buntubulamu ab'ekyalo bye babasungamu. Kino kibaawo olw'okuba nti waliwo embeera ey'ekinnansi / ey'ennono abantu gye beeyisaamu wamu n'eyo etwalibwa okuba ey'omulembe.

Edda, buli kitundu kyalinanga ebintu bye kyakolanga okulaba nga bakooma amazzi gaabwe okuvira ddala gye gava okutukira ddala mu maka gaabwe. Enzizi zaavunaanyizibwangako abantu b'ekitundu bonna. Wabeerangawo okuzigogola buli ssabbiiti, nga muno mwe muli okusaawa ebisiko ebyetoolodde oluzzi, okulima akakubo akagenda e mugga, n'okugya mu ebikyafu byonna ebiri mu luzzi. Wabeerawo mateeka amakakali ge baatekanga ku luzzi bwelwabeerangamu eby'enyanja ebiramu kyategeezanga nti amazzi malungi era mayonjo, naye singa mwasangibwangamu eby'enyanja ebifu, kino nga kitegeeza nti amazzi si mayonjo.

Wabeerangawo enkoma gye bateekanga ku luzzi ng'ekwata erudda n'erudda, eno yayambanga abantu abajja okukima amazzi nga tebagalinnnyemu.



Ng'amazzi gatuuse ewaka, baagaterekanga mu nsuwa naye nga ag'okunywa gateekewa mu nsuwa ey'enjawulo. Eno baasokanga kuginyookeza n'ebiwata by'amatooke bye bakazizza. Kino kyayambanga okuleeta akawoowo mu mazzi ago. Okuva mu nsuwa, baakozesanga olwendo okugasena, kino kyayambanga mu kukuma obuyonjo anti luliko omukonda omuwanvu nti omuntu aba tasobola kukwata mu mazzi! Enkola eno yadibizibwa era kizibu nnyo okusanga amaka omukyoli olwendo wadde ensuwa ezitereka amazzi! Bwe tudda ku maka ag'omulembe, amazzi ag'okunywa bagagulira mu macupa oba bagafumba ne gateekewa mu budomola obuyonjo olwo abanywa aganniyogoga ne bagateeka mu ffiiriigi. Abantu bakubirizibwa okwewala okukozesa empeke ezirongoosa amazzi olw'okuba nti ate zireeta obulabe mu mazzi. Amazzi gano gasobola okukozesebwa awaka okugeza mu kwoza engoye, ebintu okunaaba, okusimuula ennyumba ne mu kaabuyonjo.



Ekyokukola 2. Okuwandiika

Mu bibinja, abayizi baddemu bino wammanga

- a) Banokoleyoabantuabaali babeera n'omuwandiisi mu maka gaabwe mu kusooka
- b) Baweensongaeyawiiirakoabantuabalalaokweyunga kwaboabaali babeera n'omuwandiisi.
- c) banokoleyoebintuebikolebwabantuabavudde mu kyalo ab'ekibuga bye basanga bya ngeri.
- d) Balageemirundienziziz'omukyalo gyezaagogolwanga mu wiikiemu
- e) Bannyonyoleembeeraeyaleeterangaabantuokumanya nti amazzi g'omuluzzi mayonjo
- f) Banokolekayoebikolwamu palagulaafusesembayonga binnyonyola emigaso gy'amazzi.
- g) Bannyonyoleamakuluagali mu bigambo okusinziiranga bwebikozeseddwa mu kitunduekywaggulu?
 - (i) Obutanbanguko
 - (ii) Bannakibuga
 - (iii) Okutuuka kuntu

6.4: Okufunza

Okufunzabwebukuguobulalaa omuyizi bweyeetaaga okuyiga. Omuyizi muiyigirizentioluuusikyetaagisa okufunzaebiwandiiko ebitali bimuokusobolaokubifunamuobubakaobukulu bwokka. Bino wammangabikulunnymuyiziokubiyiga ng'enkolaennungi ezigobererwamu kufunza.

- Okusomaekitunduokusooka
- Okwetegerezaolulimiolweyambisiddwamu kibuuzo, okugeza, bwebagamba nti, "Mu bigamboebitasukka 120....." oba "Mu bigambonga 100...." Ate "Mu bigambo ebitakkwansiwa 100..." kiba kitegeezaki?
- Okwetegerezaensongenkulu ezimugambiddwaukuggya mu kitundu
- Okusookaokuwandiikaebbagonga tannawandiika kifunze kisembayo
- Abayizi beetaagaokujjukiran ti omutwegw'ekifunze gusinziiraku kibuuzoekiba kibuuziddwa.

- Kirungi nnyo okwewayambisa ebigambo ebibye ku bubwe ng'afunza
- Ebisoko, engero, n'enjogera tezikozesebwa mu kifunze
- Ebigambo ebiba mu kyogenza bikyusibwa ne bizzibwa mu kyewaabya. N'ebirala.



Ekyokukola 1. Okusoma

Abayizi basome ekitundu ekibaweeddwa n'obwegendereza:

Endwadde eziva ku kukozesa amazzi: Ebizireeta n'engeri gye tuyinza okuzeewalamu

Munsi ya leero abantu balwala endwadde ezitali zimu, naye ng'ezimu ziva ku kukozesa mazzi amakyafu. Endwadde eziva ku mazzi okusinga zireeta nnyo obukosefu obuva mu kukozesa amazzi amakyafu. Obukosefu obuva mu kukozesa amazzi amakyafu obusinga buva ku kukozesa amazzi agaba gayingiddemu obuwuka. Wadde kino kiri bwe kityo, naye tekitegeeza nti buli buwuka obubeera mu mazzi buviirako obulwadde obuva ku mazzi.

Eky'okulabirako, ensiri zizaalira mu mazzi, naye obulwadde bw'omusujja gw'ensiri ate tebutwalibwa kuba bulwadde obuva ku kukozesa amazzi amakyafu.

Okusinziira ku kitongole ky'ensi yonna eky'ebiyobulamu ekya "World Health Organisation", abantu abawerera ddala ebitundu bisatu n'obutundutundu mukaaga ku buli kikumi (3.6%) balwala endwadde ezive ku mazzi ate kwabo akakadde kamu n'emitwalo ataano ne balusuulamu akaba.

Ekitongole kino era kiteebereza nti ebitundu ataano mu muaana ku buli kikumi (58%) ku bantu abafa buli mwaka, obuzibu businga kuva ku kukozesa mazzi makyafu, obukyafu bw'ebifo mwe babeera n'obutaba bayonjo bbo b'enyyini ku mubiri gyabwe.

Obulwadde obuva ku mazzi buleetebwa ebintu bibiri. Omukka oguva mu biragalalagala ebiteekewa mu mazzi okugayonja okuva mu makolerero n'obukyafu obuva mu ddagala erikozesebwa mu kufuyira omuddo. Ng'ojojeeko ekkyo, waliwo obukyafu obuva ku buwuka obatalabika obukyafuwaza amazzi ne buvaako endwadde.

Obukyafu buno obusinga mu mazzi buva ku bantu n'ensolo okugagendamu. Kino kitegeeza nti obukyafu busobola okubeerawo mu mazzi g'omubibuga ag'anzizi, agava mu nnayikondo n'ebifo ebirala ebibeeramu amazzi okugeza emigga, n'ennyanja.



Endwadde zino zisinga kwegiriisa mu kunaaba, kwoza, okunywa amazzi oba okulya ekintu kyonna nga kyagenzeeko amazzi amakyafu.

Wadde nga okusesema n'ekiddukano bwe bubonero obusooka okulabika ku muntu alwadde obulwadde obuva ku kukozesa amazzi amakyafu, waliwo obubonero obulala omuli okusiyyibwa olususu, amatu, n'amaaso, n'okufuna obuzibu mu kussa. Okwo kwogatta okulumizibwa mu lubuto, omusujja gw'omubyenda, ekiddukano ky'omusaayi, ne kkolera. Endwadde zino zisobola okujja ngaz'amanyi ddala era aba alwadde n'ayisibwa ddala bubi.

Gye tubeera, mu masomero ne mu bitundu byaffe waliwo ebintu bingi bye tusobola okukola okwetangira n'okusasaanya kw'endwadde zino. Tufube okulaba nga tukozesa amazzi amayonjo.



Tusobola okusengejja amazzi ne gavaamu obukyaffu bwonna, okunywa amazzi amayonjo nga tukozesa eby'okunyweramu ebiyonjo. Laba nti amazzi g'okunywa gateekewa mu kintu ekiyonjo okwo gattako okuterekebwa awantu awayonjo nga gabikkiddwako bulungi. Amazzi bwe gaba ag'okunaaba, gattamu eddagala eritta obuwuka okugeza "dito".

N'ekisembayo weegemese endwadde ezo ezi sobola okugemebe wa olyoke obeere mu bulamu obweyagaza. Obuyonjo bw'omubiri nabwo bwetagisa nnyo, okunaabaa mu ngalo ne ssabbuuni ng'ova mu kaabuyonjo, nga tonnalya mmere ne bwoba omazze okulya. Emmere yonna kyatteeka okusooka okugyozaako nga tennafumbwa, ate era n'eriibwa ng'eyidde bulungi.



Obulwadde obuva ku mazzi buyinza okubalukawo mu kitundu kyonna, wadde nga businga kulumba ebitundu by'omukyalo n'ebifo ebirimu abantu abangi. Kino kiri bwe kiti olw'ebbulu ly'ebintu ebikozesebwा okulaba nti abantu bano bafuna amazzi amayonjo, okugogola emyala n'okukuumma obuyonjo bw'ekitundu. Obulwadde buno businga kulumba baana bato, abakadde n'abo abalina ebirwadderwadde ebirala.



Ekyokukola 2. Okuwandiika

Abayizi baddemu ebibuuzo ebikwata ku kitundu ekyo waggulu:

1. Mu bibinja,
 - a) Bannyonyole Iwaki obulwadde bw'omusujja tebulibwa mu ndwadde eziva ku kukozesa amazzi amakyafu.
 - b) Banokoleyebintu bibiri ebiviirako obulwadde obuva ku mazzi.
 - c) Bawandiike emiwendo gino mu bigambo
 - (i) 3.6%
 - (ii) 1.500.000
 - (iii) 58%
 - (iv) 84200
 - d) Bafunze ekitundu nga bawandiika engeri gye tuyinza okwewalamu endwadde eziva ku mazzi mu bigambo kikumi (100)

6.5: Okukyusa

Abayizi bategeze nti waliwo ennimi nnyingi ezoogerwa mu nsi muno, nga wano mu Uganda wokka tulina ennimi ezisukka mu asatu (30). N'olwekyo olumu tuba mu mbeera etwetaagisa okuwuliziganya naye olw'okuba twogera ennimi za njawulo, kirabika ng'ekizibu oluusi n'obutasobokera ddala!

Kye kiva kyetaagisa omuntu owookusatu ateegera obulungi ennimi z'babiri ng'asobola okukyusiza omu ku bbo mu lulimi lwategeera. Okukyusa kuba mu kuwandiika ate okutaputa ne kubeera mu kwogera.

Era abayizi kibeetaagisa okumanya nti ekigendererwa ky'okukyusa oba okutaputa kwe kutuusa obubaka nga bwe bwogeddwa obutakyusaamu kigambo wadde naye nga tetwerabidde njawulo eri wakati w'abantu abo bombi mu ebuwangwa.

Kikulu nnyoabayizi okubategeeza kun kola enkulu ebbiri ezeeyambisibwa mu kukyusa, omuli;

Okukyusa amakulu

Omuyizi mutgeeze nti mu kukyusa okw'engeri eno essira liba mu kufuna makulu nga bwe gali mu kitundu ekikyusibwa ne tugaleeta bulambalamba mu lulimi lwe tuzzaamu, nga ab'olulimi lwe tuzzaamu bwe bayinza okugategeera obulungi.

Okukyusa ekitundu nga bwe kiri

Mu nkola eno akyusa afuba nnyo okulaba nga okugeza ekitundu bwe kiba kitontome, n'ekikyuse kirina kubbeera kitontome. Bweba bbaluwa n'esigala nga bbaluwa, n'ebirala.

Kyokka ekikulu abayizi kye balina okuyiga kwe kufuna ebigambo ebirina amakulu ge gamu n'ago agali mu kitundu ekikyusibwa, ne babikozesa okuggyayo obubaka obwetaagisa.. okugeza singa omuyizi abadde akyusa olugero Iw'Olungereza olugamba nti, "Birds of a feather, flock together." Mu Luganda olugero olugattyayo amakulu ago lugamba nti "Mbuulira gwoyita naye nkubuulire empisa zo".



Abayizi bayuse ekitundu kino mu Luganda:

Cholera

Cholera is a waterborne disease which has claimed many people lives. This disease is caused by using unsafe water and eating contaminated food. When water gets into contact with fecal matter, under the ground or when piped water is exposed to sewage or drainage systems, it gets contaminated.

To prevent contracting and spread of cholera, requires one to practice good health habits. Boil all drinking water or use water purifiers to ensure safety of your water. Cook food properly. Wash vegetables or fruits before eating them raw. Always cover your food and water. Avoid buying food from road side vendors. Wash hands with soap before handling food, after visiting a toilet or latrine. Finally visit a health facility immediately you sense symptoms like stomach-ache and diarrhea.

Ekikyuse ky'ekyo waggulu kyandifaananyeeko bwe kit:

Obulwadde bwa kkolera

Obulwadde bwa kkolera bulwadde obusse abantu bangi. Obulwadde buno buva ku kukozesa amazzi agatali mayonjo, n'okulya emmere erimu obucaafu, ebiseera ebisinga ebeera mmere ewoze. Amazzi gagendamu obucaafu, naddala empitambi nga gayita mu midumu gy'amazzi wansi ate ewayita n'emidumu gya kazambi. Obutalwala kkolera kyetaagisa omuntu okuba omuyonjo ennyo. Amazzi g'ogenda okunywa sooka ogafumbe gaggye bulungi okukakasa nti tegaliimu bucaafu bwonna. n'emmere kola kye kimu. Enva endiirwa n'ebibala nabyo sooka obyozeeko nga tonnabirya. Bulijjo ng'etteeka bikka ku mazzi go n'emmere yo. Weewale okugula ebyokulya ku makubo. Nga tonnaba kukwata ku kyakulya kyonna sooka onaabeko mu ngalo. Kola kyekimu n'olvannyuma lw'okuva mu kaabuonyo. N'ekisembayo, genda mangu ew'omusawo singa ofuna obubonero ng'okulumwa olubuto, oba embiro.

6.6: Nnakongezalinnya

Abayizi bajukize nti mu ssuula 3 baayiga ku Nakongezalinnya.
Mu kitundu kino abayizi balunjamye ku bika bya nakasigirwa
eby'enzawulo;

Ebika bya Nnakongezalinnya

Nakongezalinnya ziri mu bika bina

- a) Nnakongezalinnya ez'empisa / ezengeri

Zino ziba zitubuulira ku ngeri erinnya eryogerwako
gye lyakulamu. Zizimbirwa ku bikolo nga, -tamiivu,
-ddungi, -nnene, - lungi n'ebirala.

- b) Nnakongezalinnya endazi

Zino ziba ziraga erinnya eryogerwako we liba liri.
Zifaananira ddala ne Nakasigirwa endazi.

Ebyokulabirako,

- Omulenzi ono
- Omukazi oli

Abaana abo

- c) Nnakongezalinnya ez'omuwendo/ez'obungi

Ziba ziraga obungi bw'erinnya eriba lyogerwako.
Ebyokulabirako,

Abasajja basatu babadde wano

Kasooli muyitirivu mu katale ennaku zino.

Ebigambo ebirala ebyeyambisibwa okulaaga
nakasigirwa ez'engeri eno mulimu ne bino;
-kkekwa, muswaba, nfaafa, -ngi, -tono, nkumuliit,
lumaggamagga, munaganwa, n'ebirala

Nakongezalinnya embuuzi

Zino zifaanagana ne nakasigirwa embuuzi,
naye enjawulo ebaawo nti buli lwe tukozesa
nakongezalinnya, erinnya erinnyonnyolwa
nakasigirwa lirina okubaawo mu sentensi.

Ebyokulabirako:
Oyagala muwala ki?
Nkuleetere ebitabo bimeka?
Omwana aliwa gwe nkutumye?



Ekyokukola 1. Okwogera n'okuwuliriza

Mu bibinja abayizi bamenye ebitonde by'omumazzi bibiri era babyogerekko nga mukozesa ebika bya nnakongezalinnya byonna ebina.



Ekyokukola 2. Okusoma


Abayizi basome ekitontome kino n'obwegendereza:

Mukene

*Mukene, mukene, ani atamumanyi?
Erinnya olina limu, naye emigaso ntoko,
Ezaali enva z'embwa,
N'emu mmere y'enkoko,
N'eyembizzi sigyerabidde,
Nga n'erinnya ngege y'abaavu
Ly'agikalako dda!*

*Kati zafuuka za buli omu,
Mukulu, mukadde, muvubuka,
Mugagga, mwavu ffena ezo,
Baana ba ssomero, bakuumi ba ddembe,
Tulya ne tukuba ne nnoga.
Mukene , mukene, ani atakumanyi*

*Omubiri gwo gutemagana, ani atakumanyi,
Okanula amaaso, otiisa n'omuto,
Naye ng'emigaso nfa afa ffe gye tumanyi
Weeyagalira amazzi ggwe n'okunakkuna.
Weyagale wamma amazzi bwe bulamu.*



*Mu byenyanja teri abasing muwendo,
Mu bungi muzaalibwa, mu bungi mufa,
Ne mufuuka emmere eri eby'enyanja ebirala,
N'abantu nga kwotadde,
Nva z'abto n'abakazi abali embuto,
Olibwa bulamba teri kusala bif!*
*Magumba, byenda, bigagamba byonna,
Lubuto y'amanya.*

*Ebisoko n'engero ebiva ku mukene ntoko,
Otemagana nga mukene, obadde okimanyi,
Omuganda yamulaba, kyokka atemagana,
Ani atamumanyi mukene, ani atamumanyi!*



Ekyokukola 2. Okuwandiika

1. Mu bibinja abayizi,
 - a) Bannyonyole ekitontome kino kye kyogerako.
 - b) Banokoleyo ebitonde ebyasooka okulya mukene
 - c) Balage Nnakongezalinnya ezikooneddwako mu kitontome

Ekyokukola ekiwumbawumba essuula

Omuyizi awandiike okwogera kw'anaakola ng'omukulembeze w'abayizi avunaanyizibwa ku by'obuyonjo mu ssomero lye ku mutwe ogugamba nti, "Obukulu bw'okubeera n'amazzi amayonjo". Akitwale nti okwogera kuno ajja kukukola ng'amasomero gakuza olunaku lw'okukuma amazzi nga mayonjo, olukuzibwa mu nsi yonna buli mwaka.

Engabanya y'obubonero



Ebisuubirwa mu tuyizi	Ebinnyonyola	Enkola esooka	Enkola eyookubiri	Enkola eyokusatu
Omusene gw'okuwandiika okwogera.	Amenye ku bakulu abaliwo, yeeyanjule, ayanje onsonga y'okwogera ko, awumbewumbe, Yeebaze okuwulirizibwa, asiibile	Singa omuyizi alagake bitono ku bimusuubirwamu, afune obubonero 03	Singa omuyizi alekayo kimu ku bimusuubirwamu, afune obubonero 05	Singa omuyizi amalayo ebyo byonna obimusuubirwamu, afune obubonero bwonna 08
Ekinyusi/ obubaka/ onsonga. Aletee ebirungi ebirungi ebiri mu nkola y'okugoberera amateeka n'ebiragiro.	Speaks with confidence, authenticity and credibility.	Singa omuyizi ayogerako bitono ku bimusuubirwamu, afune obubonero 04	Omuyizi alekayo kimu ku bimusuubirwamu afune obubonero 08	Omuyizi singa amalayo obimusabiddwa mu kibuuzo, afune obubonero 12
Empandiika entongole.	Omuyizi agoberere empandiika y'Oluganda entongole, naddala ng'alaga okuwangaala, okuggumira, enkozesera y'ennyukuta nga, L ne R, W ne Y, ñ, M ne N, n'ebirala.	Omuyizi atagoberedde mpandiika ntongole n'akamu, afune akabonero 01	Omuyizi agobereddeko waakiri bibiri ku bimusuubirwamu, afune obubonero 02	Omuyizi atuukirizza waakiri amateeka ana ku ago agafuga empandiika entongole afune obubonero 05
Omugatte gw'obubonero		Obubonero 25		